

---

**‘BETO YIMBILA  
YEHOWA  
NA KIESE YONSO’**

BANGOGO MPAMBA

---

# ‘BETO YIMBILA YEHOWA NA KIESE YONSO’

—1 BANSANGU 15:16

BANGOGO MPAMBA

---

Zina

---

Dibundu

**Mukanda yai kele ve ya kuteka. Kubasika na yo kele mosi ya mitindu ya ksalu ya kulonga bantu Biblia na ntoto ya mvimba ya me simbama na makabu ya luzolo ya mbote.**

**Sambu na kupesa makabu, kota na [www.jw.org](http://www.jw.org).**

*'Beto Yimbila Yehowa na Kiese Yonso'—Bangogo Mpamba*  
*"Sing Out Joyfully" to Jehovah—Lyrics Only*  
Kuniemama ya Marsi 2017

Kongo (sijyls-MK)

© 2017

Watch Tower Bible and Tract Society of Pennsylvania

Bambasisi

Watchtower Bible and Tract Society of  
New York, Inc., Wallkill, New York, U.S.A.

Made in Japan

Yo me niemama na Japon



sijyls-MK  
200716

---

## Index ya Bantu-Diambu

<i>Yehowa</i>	1-12
<i>Yezu/Nkudulu</i>	13-20
<i>Kimfumu</i>	21-24
<i>Bantu ya Bo Me Tulaka Mafuta</i>	
<i>mpi Mameme ya Nkaka</i>	25-27
<i>Bangwisana ti Yehowa</i>	28-40
<i>Kisambu</i>	41-47
<i>Kudipesa</i>	48-52
<i>Kisalu na Beto</i>	53-84
<i>Balukutakanu</i>	85-93
<i>Masonuku</i>	94-98
<i>Kimpangi na Beto</i>	99-103
<i>Bikalulu ya Nzambi</i>	104-130
<i>Dibuta/Banduku</i>	131-138
<i>Kivuvu na Beto</i>	139-147
<i>Luguluku/Lufutumuku</i>	148-151

---

# 1

## *Bikalulu ya Yehowa*

(Kusonga 4:11)

1. Yehowa Nzambi, nge ke nkwa-ngolo,  
Nge muntu gangaa luzingu mpi nsemo.  
Bima ya nge me salaa ke songa  
Ngolo na nge ya nene mpenza.
2. Luyalu na nge ke ya lunungu.  
Mpi bansiku na nge yonso ke mbote.  
Ndinga na nge ke songaka beto  
Mayele na nge mbote-mbote.
3. Zola kele kikalulu na nge,  
Yina me luta bikalulu yonso.  
Beto ta longaka zina na nge,  
Ti kikesa mpi kiese mingi.

## *Zina na Nge Yehowa*

(Nkunga 83:18)

1. Nzambi ya kieleka—  
    Ngangi ya bima yonso  
Ee na bantangu yonso—  
    Nge kele Yehowa.  
Beto ke na kiese  
    Mpi na dibundu na nge.  
Beto ke longa bantu  
    Yonso nkembo na nge.

*(REFRAIN)*

*Yehowa, Yehowa,  
    Nge mpamba ke Nzambi.  
Ya nkaka ke ve na zulu  
    To awa na ntoto.  
Nge kele Nkwa-ngolo yonso,  
    Bantu fwe zaba yo.  
Yehowa, Yehowa,  
    Nzambi ya nkaka kele ve.*

2. Nge ke kumisaka  
Beto kaka mutindu,  
Ya nge me zola Nzambi—  
Nge kele Yehowa.  
Bo ke bingaa beto  
Bambangi na nge Tata.  
Kunata zina na nge—  
Ke lukumu'a nene.

*(Refrain)*

# 3

## *Ngolo na Beto mpi Kivuvu na Beto* (Bingana 14:26)

1. Yehowa nge me pesaa beto  
kivuvu ya ngolo.  
Yo ke kitoko yo yina  
bantu fwete wa yo.  
Kansi basusi ya luzingu  
ke pesaa beto boma,  
Ebuna kivuvu yina  
ke lembaka mpenza.

### *(REFRAIN)*

*Nge ke kivuvu mpi ngolo na beto,  
Nge ke pesaa beto yonso.  
Beto ke longaka, kukonda boma  
sa nge ke kebaka beto.*



2. O Yehowa, sadisa beto  
na kuvila nge ve.  
Nge ke katulaka beto  
ntangu yonso mawa.  
Mabanza'a ke pesa kikesa  
le pedisa dia tiya,  
Sambu beto longa zina  
na nge ti kikesa.

*(Refrain)*

## 4 “Yehowa Kele Ngungudi na Mono” (Nkunga 23)

1. Yah ke Ngungudi na mono;  
Mu ta landaka yandi.  
Yandi zaba bivuvu na mu,  
Mpi nzala’a ntima na mu.  
Yandi ke nataka mono  
Na banseke ya mbote.  
Yandi ke twadisaa mu na zola  
Na bisika ya ngemba.  
Yandi ke twadisaka mono  
Na bisika ya ngemba.
2. Banzila na nge yonso ke  
Ya lunungu mpi’a mbote.  
Kubika ve mu vila nzila  
Sambu na zina na nge.  
Ata mono kutambula  
Na miwanda ya mpimpa,  
Mu ta wa ve boma ata fioti,  
Sa nge ke Nduku na mu.  
Mu ke vandaka ve na boma,  
Sa nge ke Nduku na mu.

3. Yah nge ke Ngungudi na mu;  
Mono ke landaka nge.  
Nge ke pesaka mu kikesa  
Mpi yonso ya ke mfunu.  
Kivuvu na mu ke ngolo,  
Sa nge ke na luzingu.  
Monisila mu zola'a kwikama  
Na luzingu ya mvimba.  
Monisila mu zola na nge  
Na luzingu ya mvimba.

# 5 *Bisalu ya Kuyituka ya Nzambi* (Nkunga 139)

1. O Nzambi nge me zaba ntangu,  
Mu ke lalaa mpi ke telamaka.  
Nge me tala ntima na mono mbote,  
Nge me zaba mpi mambu ya  
mu ke tuba.  
  
Nge monaa mikwa na mu yonso,  
Ntangu mu vandaka kusalama.  
Nge monaa mu na ntwala mu butuka.  
Mono ke kumisa  
mambu na nge Nzambi.  
  
Mayele na nge ke ya kuyituka;  
Mpi moyo na mono me zaba yo.  
Kana mono bumbana na mudidi,  
Mpeve na nge ta mona mu kuna.  
  
Wapi mu le tina nge Nzambi,  
To kukwenda sa nge mona mu ve?  
Ata kisika mosi ve yo vanda  
Na zulu, na nsi'a masa, to  
na mudidi.

# 6 *Zulu Ke Kumisaka Nzambi* (Nkunga 19)

1. Zulu ke kumisaka nge Yehowa.  
Beto ke mona mambu'a nge me salaka.  
Konso lumbu ke pesaa nge nkembo.  
Bambwetete ke songaka,  
Ngolo na nge yonso.
2. Nsiku ya Yehowa ke ya kukuka,  
Bangibusa nandi ke twadisaa beto.  
Balukanu nandi ke ya mbote.  
Ndinga nandi ke kieleka,  
Yo ke ntomo mingi.
3. Boma ya Nzambi kele na nsuka ve.  
Bantuma na yandi ke taninaa beto.  
Bansiku nandi me luta wolo.  
Beto yonso fwe kotila Zina  
nandi'a santu.

# 7 *Yehowa Kele Ngolo na Beto* (Yezaya 12:2)

1. Yehowa nge ke ngolo na beto,  
Nge muntu ke gulusaka beto.  
Nsangu na nge beto ke longaka,  
Ata bantu kuwa to bo buya.

*(REFRAIN)*

*Yehowa nge ke Ngolo na beto,  
Beto fwe longa zina na nge.  
Yehowa nge ke Nkwa-ngolo yonso,  
Kisika ya beto ke tinaka.*

2. Beto ke zinga na nsemo na nge,  
Mpi ke monaka kieleka na nge.  
Beto ke fimpaka Masonuku;  
Mpi beto ke kotilaa Kimfumu.

*(Refrain)*

3. Ata Satana ke seka beto,  
Yandi ke na kuniokula beto;  
Beto ke sadila nge ti kiese.  
Sadisa beto sa beto bwa ve.

*(Refrain)*

# 8 *Yehowa Kele Kitininu na Beto* (Nkunga 91)

1. Nzambi ke kitininu  
Ya mbote kibeni.  
Beto ke bumbanaka  
Na kivudi nandi.  
Mpi yandi ke taninaka  
Bantu nandi ya kwikama.  
Nzambi ke kitininu,  
Yandi kele ya kwikama.
2. Ata bantu mingi bwa  
Na lweka na betu,  
Yehowa ta buya ve  
Bantu ya lunungu.  
Beto fwete wa ve boma,  
Mpasi ta bwila beto ve.  
Yandi ta bumba beto,  
Na nsi ya mapapu nandi.
3. Yehowa ta tanina  
Beto na bigonsa,  
Na batolo-tolo mpi  
Na boma na mpimpa.  
Kikuma ya kutekita  
Ta vanda ve ata fioti.  
Nzambi ke kitininu,  
Yandi ke kebaka beto.

# 9 Yehowa Kele Ntotila na Beto!

(Nkunga 97:1)

1. Beto pesa Yehowa nkembo,  
Sa zulu ke songaa lunungu nandi.  
Beto yimbila'andi bankunga ya kiese,  
Mpi beto longa mambu nandi.

*(REFRAIN)*

*Mazulu wa kiese, Ntoto yangalala,*

*Yehowa me kuma Ntotila!*

*Mazulu wa kiese, Ntoto yangalala,*

*Yehowa me kuma Ntotila!*

2. Beto fwe zabisa makanda  
Nkembo ya Yehowa Nzambi na beto.  
Yandi ke Ntotila, beto kumisa'andi,  
Mpi beto fukimina yandi.

*(Refrain)*

3. Yandi me tula Mwana nandi  
Na kiti'a Kimfumu kuna na zulu.  
Bika banzambi ya ntoto kuwa nsoni,  
Sa lukumu ke ya Yehowa.

*(Refrain)*



# 10 Kumisa Yehowa, Nzambi na Beto!

(Nkunga 145:12)

## 1. Kumisa! Yehowa Nzambi!

Longa zina nandi'a nene!  
Kebisa Bantu yonso nde,  
Kilumbu nandi ke ntama ve.  
Nzambi me tuba nde yayi ntangu  
Ya Mwana nandi fwe yala.  
Beto kwe zabisa bantu yonso,  
Balusakumunu'a Nzambi!

*(REFRAIN)*

*Kumisa! Yehowa Nzambi!*

*Longa nkembo nandi na ntoto!*

## 2. Kumisa! Zina'a Yehowa!

Na ndinga'a ngolo ti nkunga!  
Zabisa Lukumu nandi,  
Na kikesa mpi sa na ntonda.  
Ata Yehowa ke nene yandi  
Ke kudikulumusaka.  
Yandi me zaba mpusa na beto,  
Mpi ke ndimaka bisambu.

*(Refrain)*

# 11 *Lugangu Ke Kumisaka Nzambi* (Nkunga 19)

1. O Yehowa, bisalu na nge ke,  
Mingi mpenza, yo ke kumisaa nge.  
Lugangu ke tubaka na pima,  
Ntoto'a mvimba le wa nsangu na yo.  
Lugangu ke tubaka na pima;  
Ntoto'a mvimba le wa nsangu na yo.
2. Boma na nge kele luyantiku  
Ya ngangu mpi mayele'a kieleka.  
Nsiku na nge ke siamisaa beto,  
Yo me luta wolo ya kitoko.  
Nsiku na nge ke siamisaa beto,  
Yo me luta wolo ya kitoko.
3. Kuzaba nge me tomisaa beto,  
Mpi Biblia, ke taninaa beto.  
Nge ta pesa lukumu ya nene  
Na bayina ke santisaka nge.  
Nge ta pesa lukumu ya nene  
Na bayina ke santisaka nge.

# 12

## *Nzambi ya Nene, Yehowa*

(Kubasika 34:6, 7)

1. Nzambi ya Nene, nge me fwana na,  
Kubaka nkembo mingi,  
Nzila na nge ke mbote.  
Nge ke mayele, ngolo mpi zola.  
Nge ke Nzambi mvu na mvu.
2. Tata, beto ke kaka putulu.  
Wila beto mawa mpi  
Wa bisambu na beto.  
Nge ke longaka bansadi na nge!  
Nge ke sadisaa beto.
3. Zulu ti ntoto ke kumisaa nge.  
Beto mpi ke pesaa nge  
Nkembo bilumbu yonso.  
Nzambi ya Nene, Yehowa pardo,  
Ndimba nkembo na beto.

# 13 *Kristu Kele Mbandu na Beto*

(1 Piere 2:21)

1. Nzambi monisilaa Bantu yonso zola,  
Ntangu yandi pesaka Mwana nandi.  
Kristu kumaa muntu;  
Pesaa mbandu'a mbote,  
Yo kumisaka zina ya Nzambi.
2. Ndinga ya Yehowa Sadisaka yandi  
Yo pesaka yandi Mayele mpi ngolo.  
Yandi pesaa beto  
Mbandu mosi'a mbote,  
Yandi sepedisaa tata nandi.
3. Kumisa Yehowa Bonso Yezu Kristu.  
Landa mbandu nandi  
Na mambu yonso.  
Mpi sala mpidina Bubu, kimakulu,  
Ebuna Nzambi ta ndimaka nge.

# 14 *Beto Kumisa Ntotila ya Mpa ya Ntoto* (Nkunga 2:12)

1. Yezu ti dibundu nandi  
ya santu ke vukisa,  
Bantu mingi kibeni ya  
konso nsi mpi dikanda.  
Kimfumu'a Nzambi ke yala;  
Ntama ve luzolo nandi  
Ta salama awa na ntoto,  
Yo ke kivuvu ya kiese.

*(REFRAIN)*

*Kumisa Yehowa Mpi Mwana na yandi—  
Ee ntotila ya bantotila.  
Ntangu yayi na kimvuka beto  
Fwete kumisa yandi.*

2. Beto ke kumisa Kristu,  
Ntotila ya ke yala.  
Mfumu yayi ya ngemba ta  
gulusa beto mpenza.  
Mambu'a kiese ke na ntwala:  
Boma ta vanda diaka ve.  
Mfumu ta futumuna bafwa.  
Yo ta vanda ntangu'a kiese!

*(Refrain)*

1. Lukumu na Yezu,  
 Ntotila ya ke yala.  
 Yandi ke yalaka na  
 Lunungu, mpi kieleka.  
 Ti lukumu mpi zola  
 Sa na zina'a Nzambi,  
 Yandi ta kwi nwanina  
 Kimfumu'a Yehowa.

*(REFRAIN)*

*Lukumu na Yezu!*  
*Ntotila ya ke yala.*  
*Na ngumba ya Sioni,*  
*Yandi ke na kuyala!*

2. Lukumu na Yezu,  
 Yandi fwilaka beto.  
 Ya futaa nkudulu sa  
 Nzambi lolula beto.  
 Nkento'a Kristu ke kinga,  
 Makwela na zulu.  
 Yo ta songa lunungu  
 Ya luyalu'a Nzambi.

*(Refrain)*

# 16 *Beno Kumisa Yah mpi Yezu* (Kusonga 21:2)

1. Nzambi me ponaka Yezu  
Na kuvanda ntotila.  
Luyalu nandi ya lunungu,  
Ta sala luzolo'a Tata.

*(REFRAIN)*

*Be kumisa Nzambi mpi Yezu.  
Be mameme ya kwikama,  
Beno ya ke landaa, ke zitisaa  
bansiku nandi yonso.  
Be kumisa Nzambi mpi Yezu,  
Mfumu ya kele na zulu,  
Yina Yehowa me pona sa ya  
kumisa zina nandi.*

2. Yehowa Nzambi me ponaa  
Bampangi'a Yezu Kristu.  
Bo yonso ta vanda bamfumu  
Mpi ta tula Paladisu.

*(Refrain)*

1. Yezu vandaa muntu'a mbote,  
Ya zola mpi ya ntima-nda.  
Ya sadisaa beto  
Na mambu'a salaa;  
Mpi yandi kuditambikaa.  
Yandi vaa belula bantu,  
Bifwa-meso, mpi bikata.  
Yandi lungisaa kisalu nandi  
Mpi yandi tubaa: 'Me zola.'
2. Beto fwe fulula Yezu  
Konso ntangu mpi kilumbu.  
Beto fwe monisa  
Ntima ya mbote  
Mpi zola na bantu yonso.  
Beto fwe sadisanaka;  
Beto fwe zola bampangi.  
Kana bansukami kulomba nge,  
Nge ta tuba nde: 'Me zola.'



# 18            *Ntonda Sambu na Nkudulu* (Luka 22:20)

1. Bubu beto ke na  
    ntwala na nge Nzambi,  
    Sa nge monisilaa  
    beto zola ya mingi.  
    Nge pesaa Yezu sa beto  
    baka moyo.  
    Kimenga yina me luta  
    bimenga yonso.

*(REFRAIN)*

*Ya pesaa luzingu nandi,  
    Sambu na kusumba beto.  
Beto fwete,  
    pesaka nge ntonda kimakulu.*

2. Yezu pesaka kimenga  
    na luzolo,  
    Luzingu nandi'a kukuka  
    na zola yonso.  
    Beto yonso beto  
    kondaka kivuvu.  
    Kansi yandi katulaka,  
    beto na lufwa.

*(Refrain)*

# 19 *Madia ya Nkokila ya Mfumu*

(Matayo 26:26-30)

1. Yehowa Tata'a ke na zulu,  
Mpimpa yayi ke ya santu!  
Na ntangu yina nge songaa bantu yonso  
Zola, mayele, lunungu.  
Dimeme'a Paki taninaa bo,  
Mpi bo bakaka kimpwanza.  
Na nima Kristu tiamunaa menga nandi  
Sa mbikudulu kulungana.
2. Dimpa ti vinu ke yibusa,  
Nkudulu ya nge pesaka  
Sa na kukatula beto na kimpika.  
Yezu lemfukaa na yonso.  
Beto ke ta lusungiminu;  
Na ntonda'a kukonda nsuka  
Mutindu nkudulu gulusaka beto  
Yo katulaa beto na lufwa.

3. Beto kele na ntwala na nge.  
Sa nge me bingisa beto,  
Sa beto kumisa nge ti Mwana na nge,  
Sa na zola na nge'a nene.  
Lusungiminu ke pesaka  
Bansadi na nge kikesa.  
Beto fwete zinga mpila Kristu tubaa,  
Mpi beto ta baka luzingu.

1. Yehowa Nkwa-ngolo,  
Kivuvu vandaa ve,  
Kimenga'a Yezu me  
Pesa beto yo!  
Beto ke pesa nge,  
Luzingu na beto.  
Beto ta longaka  
Mpi luzolo na nge.

*(REFRAIN)*

*Nge pesaka Yezu,  
Mpi beto ke yimba,  
Nkunga mosi ya beto  
ta yimbaka kimakulu.*

2. Bumbote ya Nzambi,  
Ke bendaka beto,  
Mpi beto ke zolaa,  
Zina na yandi,  
Yandi me pesaka  
Dikabu'a kitoko.  
Ntotila kufwaka  
Sa na beto yonso.

*(Refrain)*

*(NSUKA)*

Yehowa Nkwa-ngolo, beto ke tonda nge,  
Sambu nge me pesaa Yezu sambu na beto.

# 21 *Landa na Kusosa Ntete Kimfumu*

(Matayo 6:33)

1. Yehowa ke sepelaka  
Na Kimfumu ya Yezu,  
Na nzila na yo yandi ta  
Yidika mambu yonso.

*(REFRAIN)*

*Sosaka ntete Kimfumu  
Ti lunungu ya Nzambi.  
Sadila'andi na kwikama,  
Mpi kumisaka yandi.*

2. Kudiyangisa ve sambu  
Na madia ti bilele.  
Sosa ntete Kimfumu mpi  
Nzambi ta sadisa nge.

*(Refrain)*

3. Zabisa nsangu ya mbote  
Na bantu ya me fwana.  
Bo tula ntima na Nzambi  
Mpi na Kimfumu nandi.

*(Refrain)*

***Kimfumu Ke Yala***  
***—Bika Yo Kwisa!***  
 (Kusonga 11:15; 12:10)

1. Yehowa Tata na beto,  
 Nge ke zingaa kaka.  
 Yezu me baka Kimfumu  
 Mpi yandi ke yala.  
 Ee Kimfumu me butuka;  
 Yo ta yala ntoto'a mvimba.

***(REFRAIN)***

*Bubu luguluku,*  
*Ngolo, Kimfumu me kwisa.*  
*Kimfumu ke yala.*  
*“Bika yo kwisa, yo kwisa!”*

2. Beto zaba nde Satana  
 Me kuma na nsuka.  
 Ata bampasi ke mingi,  
 Kiese ke na ntwala.  
 Ee Kimfumu me butuka;  
 Yo ta yala ntoto'a mvimba.

***(Refrain)***

3. Bawanzio kele na kiese,  
Bo ke yimba nkunga.  
Na zulu bo me katula  
Muntu ya luvunu.  
Ee Kimfumu me butuka;  
Yo ta yala ntoto'a mvimba.

*(Refrain)*



## 1. Kimfumu ya Yehowa

Me yantika kuyala.

Yezu ke ntotila na Sioni.

Mpi beto fwe yimbila

Nzambi nkunga na kiese.

Kristu, Ngulusi

me yantika kuyala.

*(REFRAIN)*

*Nki Kimfumu na nge ta nata?*

*Lunungu ye mpi kieleka.*

*Nki Kimfumu ta nata diaka?*

*Luzingu'a mvula na mvula.*

*Kumisa Nzambi sa yandi*

*Ke kwikama mpi zola.*

## 2. Kristu ke na kuyala,

Mpi nsuka me finama.

Ngidika ya Satana fwe suka.

Yayi ntangu'a kulonga

Bantu mingi kieleka;

Sa bantu'a masonga

kundima Yehowa.

*(Refrain)*

3. Beto fwete kumisa

Mfumu yina ke yala.

Yandi ke kwisa na zina'a Nzambi.

Kwi kota na tempelo Sa  
nge bondila Nzambi.

Ntama ve yandi ta  
yala bima yonso.

*(Refrain)*

# 24 *Kwisa na Ngumba ya Yehowa* (Yezaya 2:2-4)

1. Beno tombula ntu,  
Mpi beno tala kuna,  
Ee ngumba ya Yehowa  
Yo kele nda mingi.

Bantu'a ke katuka  
Bisika yonso mpenza,  
Ke tubana bo na bo,  
'Be sadila Nzambi.'

Kimvuka ya fioti  
Ke kuma dikanda ya nene.  
Beto ke yela mpi  
Ke landa lutwadis'u Nzambi.

Bantu ke kwisa mpi  
Bo ke ndima Kimfumu.  
Bo ke sila nde bo  
Ta vanda ya kwikama.

2. Yezu pesaa nsiku

Ya kukwenda kulonga  
Mpi kusamuna nsangu  
Ya Kimfumu bubu.

Kristu ke yala mpi  
Ke songa bantu yonso  
Ya kudikulumusa  
Na kulanda yandi.

Beto ke wa kiese,  
Sambu kimvuka ya nene ke  
Landa na kuyela.

Beto ke sadisa bantu na

Kuzaba Yehowa;

Beto ke songa bo nde,  
'Beno kwisa na ngumba  
ya Yehowa Nzambi.'

1. Yehowa ke ti bantu,  
Ya yandi me ponaka.  
Yandi me sumbaka bo,  
Mpi ke ndimaka bo.

*(REFRAIN)*

*Bo ke kima na nge  
Nzambi mpi bo ke zolaa  
Nge mingi Kibeni.  
Bo ke longaka mambu na nge.*

2. Bo ke dikanda'a santu;  
Bo ke zolaa kieleka.  
Yehowa me nataa bo  
Na nsemo ya nene.

*(Refrain)*

3. Bo ke sala kisalu'a  
Kuvukisa mameme.  
Bo ke ya kwikama mpi  
Ke zitisaa Nzambi.

*(Refrain)*

# 26 *Beno Salaka Yo Sambu na Mono*

(Matayo 25:34-40)

1. Mameme ya nkaka ke salaa ti bantu,  
Yina Nzambi me tulaka mafuta.  
Kana beto pesa  
bo kikesa mingi  
Yezu ta pesa beto matabisi.

*(REFRAIN)*

*'Ntangu be sadisaa, bampangi na mu.  
Pana beno sadisaka mono mpi.  
Ntangu beno pesaka bo maboko.  
Beno pesaka mu mpi maboko.  
Be salaa yo sa na bo mpi sa na mu.'*

2. 'Ntangu mu vaa nzala, na mpusa ya masa,  
mpi na mpasi mingi, Be sadisa mu.'  
Bo ta tuba: 'Nki ntangu  
beto salaa yo?'  
Ebuna Ntotila ta vutula nde:

*(Refrain)*

3. Mfumu ta tubila bayina kele na  
diboko'a kitata: 'Sa beno vandaa  
Ya kwikama, be salaa  
mambu ya mbote,  
Beno baka luzingu ya kukuka.'

*(Refrain)*

# 27 *Kumonana ya Bana ya Nzambi* (Baroma 8:19)

1. Ntama ve beto ta mona  
Bantu ya kwikama.  
Na zulu bo ta yalaka  
Bo yonso ti Kristu.

*(REFRAIN)*

*Bana'a Nzambi ta monana  
Kumosi ti Kristu.  
Bo ta nunga mpi ta baka  
Lufutu ti yandi.*

2. Bayina me bikalaka  
Ta wa ndinga'a Mfumu.  
Ntotila ya bantotila  
Ta kwi vukisa bo.

*(Refrain)*

*(PONT)*

Na nima bo ta nwana mvita'a  
Nsuka ti Kristu.  
Makwela na bo ti Yezu  
Ke ya kimakulu.

*(Refrain)*

1. Nzambi nani lenda,  
    Vanda nduku na nge?  
    Nani le kuma Nduku na nge?  
    Nani me zaba nge?  
Bantu yonso yina,  
    Ke ndima Biblia,  
    Bantu ya kwikama yina ke,  
    Zingaa na kieleka.
2. Nzambi nani lenda,  
    Kota na nzo na nge?  
    Nani ke pesaka nge kiese?  
    Nani me zaba nge?  
Bantu yonso yina,  
    Ke lemfukilaa nge  
    Ke landaka luzolo na nge,  
    Mpi ke kusaka ve.
3. Beto ke pesa nge,  
    Bampasi na beto,  
    Na zola na nge konso ntangu,  
    Mfumu keba beto,  
Beto ke zola nde,  
    Kinduku kuyela.  
    Nduku ya ngolo mpenza kele,  
    Kaka nge Yehowa.



# 29

## *Beto Zitisa Zina na Beto*

(Yezaya 43:10-12)

1. Yehowa Nzambi ya mvula na mvula,  
Nge ke zola, ngolo, mpi lunungu.  
Nge ke nto ya mayele mpi'a kieleka,  
Nge muntu ke yalaka na zulu.  
Beto ke na kiese'a kusadila nge,  
Mpi ya kulonga Kimfumu na nge.

*(REFRAIN)*

*Kuvanda Mbangi ke lukumu'a nene.  
Beto fwe kumisa zina yina!*

2. Kusala kisalu'a santu kumosi  
Ke kotisaka zola mpi ngemba.  
Kulonga kieleka mpi nkembo na nge  
Ke pesaka beto kiese mpenza.  
Sa beto ke nataa zina'a Yehowa,  
Beto fwe pesa yandi lukumu.

*(Refrain)*

# 30

## *Tata, Nzambi, mpi Nduku*

(Baebreo 6:10)

### 1. Ata bubu luzingu

Le vanda mpasi mingi mpenza.  
Mu ta tuba kaka nde,  
“Yo ke mfunu mpenza.”

*(REFRAIN)*

*Nzambi ke salaa mbi ve,  
Ya ke yibukaa zola na mu.  
Mu ke ve munu mosi;  
Nzambi ke na lweka na mu.  
Yandi ta taninaa mpi  
ta sadisaa mu kimakulu.  
Yehowa ke Tata, Nzambi,  
ye mpi Nduku.*

### 2. Yayi ntangu ya mpasi, Sambu kileke me lutaka. Kansi kivuvu na mu, Kele kaka ngolo.

*(Refrain)*

1. Tambulaka ti Yehowa,  
Songa zola'a kwikama.  
Bikala pene-pene na yandi,  
Mpi nge ta baka ngolo.  
Kangama na ndinga na yandi,  
Nge ta nunga mpenza.  
Widikila mpi lemfuka,  
Nzambi ta twadisa nge.
2. Tambulaka na busantu,  
Yindula mambu'a mbote.  
Yehowa ta pesa nge ngolo ya  
Kununga mpukumuna.  
Konso kilumbu yindulaka,  
Mambu ya kieleka,  
Mambu'a mfunu mpi'a lukumu,  
Nzambi ta vanda ti nge.
3. Tambula na kiese yonso,  
Pesaka Nzambi ntonda  
Sa na makabu na yandi yonso  
Mpi balusakumunu.  
Tambula ti Nzambi na kiese;  
Mpi yimbila yandi.  
Kiese na nge ta monisa,  
Nde nge ke muntu'a Nzambi.

*Kangama ti Nzambi!*

(Kubasika 32:26)

1. Bantima na beto fulukaa ti  
Mawa mpi malongi ya luvunu;  
Kansi nsangu'a Kimfumu ya Nzambi  
Pesaka beto kiese.

*(REFRAIN)*

*Kangama ti Nzambi; Sepela nandi.  
Ya ta vila nge ve; Zitisa yandi.  
Kwe longaa nsangu ya mbote ya ngemba.  
Yehowa ke yala Na nzila'a Kristu.*

2. Beto ke sambaa Nzambi kumosi,  
Mpi ke longaa nsangu ya Kimfumu.  
Konso muntu fwe baka lukanu  
Ya kusadila Nzambi.

*(Refrain)*

3. Beto ta wa ve Satana boma.  
Beto ta tudila Nzambi ntima.  
Ata bambeni ke mingi, Nzambi,  
Ke pesa beto ngolo.

*(Refrain)*

# 33 *Losila Yehowa Kizitu na Nge* (Nkunga 55)

1. Mu ke bondila nge Tata.  
‘Ndima kisambu na mu.’  
Sadisa munu sambu mu  
Katula boma na mu.

*(REFRAIN)*

*Losila Nzambi kizitu;  
Yandi mosi ta sadisa nge.  
Yandi ta taninaka nge.  
Yandi kele kwikama.*

2. Kana mu vandaka pizio,  
Mu zo pumbuka ntinu,  
Sa na kutina bayina,  
Ke zo niokula munu.

*(Refrain)*

3. Mono ta samba Yehowa,  
Sa yandi tanina mu.  
Yandi ta sadisa beto,  
Na kunata bizitu.

*(Refrain)*

1. O Yehowa Nzambi sambisa mu;  
Tala lukwikilu mpi kwikama na mu.  
Yehowa fimpa mu mpi meka mu;  
Yobisa mabanza mpi ntima na mono.

*(REFRAIN)*

*Tala mono Me baka lukanu  
ya kutambulaka Mpenza na kwikama.*

2. Mu ke vandaa ve ti bantu ya mbi.  
Mu ke mengaa bantu'a ke buyaa kieleka.  
Kufwa mu ve ti bantu'a masumu,  
Miyibi mpi bantu yina ke swanaka.

*(Refrain)*

3. Mu ke zolaa nzo na nge Yehowa.  
Konso lumbu mu ta sadilaa nge kuna,  
Pene-pene ya mesa-kimenga,  
Sa na kutonda nge na ntima ya mvimba.

*(Refrain)*

**“Beno Zikisa Mambu  
ya Kuluta Mfunu”**  
(Bafilipi 1:10)

1. Beto ke na mfunu ya mayele,  
Ee, sambu na kuzaba,  
Mambu yina kele mfunu mingi,  
Mambu’a beto fwe sala!

**(REFRAIN)**

*Zola mambote, mambi ve.  
Zola Nzambi;  
Kana beto sala mambu’a mbote,  
Ya mayele,  
Nzambi ta sakumuna beto!*

2. Nki lenda vanda mfunu kuluta  
Kulonga nsangu’a mbote,  
Mpi kunata bantu ya masonga  
Na kusadila Nzambi?

**(Refrain)**

3. Kana beto sala mambu’a mfunu,  
Be ta vanda na ngemba;  
Zola mpi lukwikilu na beto  
Ta vanda ya kieleka.

**(Refrain)**

1. Taninaka ntima na nge,  
Mpi buya masumu.  
Nzambi ke tangaka ntima,  
Kimuntu ya kati.  
Ntima ke vandaka mbi mpi  
Yo le kusa beto.  
Yo yina tanina yo mpi  
Landa nsiku'a Nzambi.
2. Sosa Nzambi na nzila ya  
Bisambu'a masonga.  
Kumisa mpi tonda yandi  
Ee konso kilumbu.  
Nge fwete lemfukaka na  
Malongi'a Yehowa.  
Kangama ngolo ti Nzambi,  
Sa yandi wa kiese.
3. Tinaka bangindu ya mbi,  
Sala mambu'a mbote.  
Bika Biblia kusimba  
Ntima na nge mbote.  
Nzambi ke zolaka bantu  
Nandi ya kwikama.  
Nge fwete sadila yandi  
Na ntima ya mvimba.



# 37 *Sadila Yehowa na Moyo ya Mvimba* (Matayo 22:37)

1. O Yehowa, Nkwa Kimfumu,  
Mu fwete kudipesa na nge,  
Kuwila mpi kuzola nge.  
Mono fwete sadilaka nge.  
Mu ta zitisaka bansiku;  
Ye mpi bangibusa na nge!

*(REFRAIN)*

*O Yehowa, mono fwete  
Sadila nge na moyo'a mvimba.*

2. Tata, ntoto, bambwetete,  
Mpi ngonda ke kumisaka nge.  
Mu fwete vanda kwikama,  
Mpi kuzabisa zina na nge.  
Na luzingu na munu, mu ta  
Sadila nge na masonga.

*(Refrain)*

1. Nzambi katulaka nge na mpimpa mpi me  
Sadisaa nge na kuzwa kieleka.  
Sa yandi monaa nde nge vandaa ti nzala  
Ya kusosa yandi na masonga.  
Nge silaa na kusadila yandi;  
Yandi ke sadisaka nge mingi.

*(REFRAIN)*

*Yehowa sumbaka nge  
na menga ya Yezu.*

*Yandi ta pesa nge  
ngolo mpi kikesa.*

*Yandi ta twadisaa  
mpi ta taninaka nge.*

*Yandi ta pesa nge  
ngolo mpi kikesa.*

2. Nzambi pesaka Mwana nandi sa na nge;  
Mpi yandi ke zola nde nge nunga.  
Kana yandi buyaa ve kupesa Yezu,  
Yandi ta pesaka nge kikesa.  
Yandi ta vilana ve kundima  
Ti zola yina nge monisaka.

*(Refrain)*

# **39** *Zina ya Mbote na Meso ya Nzambi* (Longi 7:1)

1. Konso kilumbu, beto fwete sala  
Zina ya mbote Na meso ya Tata.  
Kana beto sala Mambu'a mbote mpenza,  
Beto ta pesa Nzambi kiese.
2. Kusosa nkembo Ti zina ya mbote,  
Na ntoto yayi Kele na mfunu ve.  
Kana beto sosa Kinduku ti ntoto,  
Mfumu Nzambi ta Buya beto.
3. Beto ke zola Nzambi kuyibuka  
Zina na beto Kimakulu mpenza.  
Beto sala zina'a Mbote tii na nsuka,  
Mpi beto tula Ntima na Yah.

# 40

## *Beto Kele Bantu ya Nani?*

(Baroma 14:8)

1. Nani Nzambi na nge?  
Nge ke zitisaa nani?  
Nzambi na nge ke muntu yina  
Nge kele na kusadila.  
Nge le sadila ve  
Banzambi zole, mingi.  
Kansi nge fwe pona kaka mosi  
Mpi kuzitisa yandi.
2. Nani Nzambi na nge?  
Nge ta zitisaa nani?  
Nzambi ya kieleka ke mosi,  
Nge fwete pona nge mosi.  
Keti nge ta landa  
Kuzitisa Kaisali?  
To keti nge ta landa kusala  
Luzolo ya Yehowa?
3. Nani Nzambi na mu?  
Mono ta zitisaka  
Mpi mono ta sadilaa kaka  
Yehowa Tata na mono.  
Yandi sumbaka mu  
Na ntalu mingi mpenza.  
Mu ta pesa'ndi luzingu na mu.  
Mpi ta kumisa yandi.

# 41

## *Wa Kisambu na Mono*

(Nkunga 54)

1. Tata'a zulu wa nkunga na mu.  
Nge ke mfumu mpi Nzambi na mu.  
Zina na nge ke nene mingi.

*(REFRAIN)*

*Yehowa wa kisambu yayi.*

2. Mersi Nzambi sa na luzingu,  
Yina nge me pesa mu bubu,  
Mpi sa nge ke songa mu nzila.

*(Refrain)*

3. Tata mu ke zola kusala,  
Mambu'a mbote mpi kutambula  
Na mwini, sadisa mu pardo.

*(Refrain)*

# 42 *Kisambu ya Nsadi ya Nzambi* (Baefezo 6:18)

1. Nzambi nkwa-ngolo yonso Yehowa,  
Zina na nge beto fwete santisa.  
Nge ke lungisaa mambu yina  
Nge ke kanaka mpi ke zolaka.  
Bika Kimfumu na nge,  
Kunata mambu'a mbote.
2. Mersi sa na balusakumunu,  
Makabu ya nge ke pesaka betu.  
Nge ke nto ya luzingu yonso,  
Nge ke pesaa nzayilu ti ngangungu.  
Beto ta pesaka nge  
Ntonda konso kilumbu.
3. Ata bubu bampasi ke mingi,  
Nge ke bwisaka bantu yonso ntima.  
Tata beto ke losila nge  
Bizitu ti bampasi na beto.  
Pesa beto ngolo ya  
Kulanda kukwamina.

# 43 *Kisambu ya Kuvutula Matondo*

(Nkunga 95:2)

1. Yehowa beto ke tonda nge mingi.  
Beto ke sala yo na kisambu.  
Beto ke tudila nge ntima'a mvimba,  
Sa nge muntu ke kebaka betu.  
Beto ke sumukaa konso kilumbu.  
Yo yina lolula beto Tata.  
Mersi sambu na nkudulu mpi sambu  
Nge me zaba beto ke mfututu.
2. Mersi sambu nge ke zolaka beto.  
Mpi sambu nge me bendaka beto.  
Longa beto na kuzaba nge mbote.  
Mpi na kuvanda kwikama na nge.  
Mersi sa na lutaninu'a bawanzio.  
Mpi sa nge ke pesa beto ngolo.  
Bika nde beto kudikulumusa  
Mpi beto pesaka nge matondo.

1. Yehowa mu ke samba nge:

“Wa kisambu na mu.”

Mputa ke nene mpi yo ke  
beluka ve nswalu.

Bangindu mpi bivuvu ya mbi  
me lembisa mu.

Nzambi pesa mono kikesa  
mpi ndima munu.

*(REFRAIN)*

*Tata pardo sadisa mu.*

*Mu me lemba, ngolo ke ve.*

*Nzambi mu ke bondila nge,*

*Pesa mu diaka kikesa.*

2. Ndinga na nge ke pesaka mu

kikesa mingi,

Yo ke basisa mawi ya mu  
le tendula ve.

Pardo sadisa mu na  
kutudila nge ntima.

Mpi na kuzaba nde  
zola na nge kele nene.

*(Refrain)*



# 45 *Mambu ya Mono Ke Yindulaka* (Nkunga 19:14)

1. Mambu'a mu ke yindulaka,  
Bangindu ya ntima na mu—  
Bika yo sepedisa nge,  
Mpi yo pesa mono ngolo.  
Kana basusi me luta  
Mpi mpongi me tina mono,  
Bika mu yindulula nge  
Mpi mambu ya kele mbote.
2. Bika nde mambu yina ke  
Ya mbote mpi ya lukumu,  
Mambu ya bo le zitisa—  
Yo pesa mu ngemba mingi.  
Nzambi bangindu na nge ke  
Mbote mpi mingi kibeni.  
Bika nde mu yindulula,  
Mambu ya nge ke tubaka.

# 46 *Beto Ke Tonda Nge, Yehowa* ( 1 Batesalonika 5:18)

1. Beto ke tonda nge Yehowa sa nge  
Ke pesaa nsemo konso kilumbu.  
Beto ke tonda nge sa beto lenda,  
Kusamba nge na ntima ya mvimba.
2. Beto ke tonda nge Yehowa sa na  
Yezu yina nungaka nsi-ntoto.  
Mersi sa nge ke sadisaka beto  
Mpi sa nge ke twadisaka beto.
3. Beto ke tonda nge Nzambi sambu na  
Lukumu'a kulonga zina na nge.  
Mersi sa nge ta manisa mambu'a mbi,  
Mpi sa nge ta sakumuna beto.

# 47 *Samba Yehowa Konso Kilumbu* (1 Batesalonika 5:17)

1. Samba sa Nzambi ke waa bisambu.  
Kwe longa zina nandi ya santu.  
Kangudilaka Yehowa ntima,  
Mpi tudila yandi ntima'a mvimba.  
Samba konso kilumbu.
2. Samba Yehowa, monisa ntonda,  
Lomba ndolula mpi lolulaka.  
Funguna masumu na nge yonso.  
Nzambi me zaba nge ke mfututu.  
Samba konso kilumbu.
3. Samba Yehowa na ntangu'a mpasi.  
Sosaka lusadisu na yandi,  
Sambu yandi ke Tata na beto;  
Tudilaka yandi ntima mingi.  
Samba konso kilumbu.

# 48 *Konso Kilumbu Tambula ti Yehowa* (Mika 6:8)

1. Tambula ti Tata na nge  
Na kudikulumusa yonso.  
Yandi ke songaa mambote  
Na bayina ke sosaa yandi!  
Nzambi ke zola nde beto  
Kutambula ti yandi.  
Beto fwete kudipesa,  
Mpi kukotila Yehowa.
2. Satana me wa makasi.  
Sa nsuka me finama mpenza;  
Bakristu ke nwanaka ti  
Kimbeni yina le lembisa.  
Nzambi ke taninaa beto;  
Beto kangama nandi,  
Beto tudila'andi ntima,  
Beto zola yandi mingi.
3. Nzambi ke sadisaa beto  
Na nzila ya Ndinga na yandi,  
Ya mpeve mpi ya dibundu,  
Mpi na nsadisa ya bisambu.  
Kana beto ke lemfuka,  
Beto ta fwana mpenza  
Kusala mambu ya mbote,  
Mpi kuvanda ya kwikama.

1. Beto me kudipesaka  
Sambu na kusadila nge.  
Beto ke vandaa na kiese  
Ya kusepedisa Nzambi.
2. Mpika na nge ya mayele,  
Ke longaa bunene na nge,  
Mpi yandi ke disaa beto,  
Sambu beto sadila nge.
3. Pesa beto mpeve na nge,  
Sa beto vanda kwikama  
Sambu beto kumisa nge,  
Mpi beto pesa nge kiese.

# 50 *Kisambu na Mono ya Kudipesa* (Matayo 22:37)

1. Baka ntima na munu  
Bika yo zola ngangu.  
Baka ndinga na mono  
Bika yo yimbila nge.
2. Baka makulu na mu;  
Sambu yo zitisa nge.  
Baka bima na mono  
Ee bima na mu yonso.
3. Baka luzingu na mu,  
Sambu mu sadila nge.  
Baka mono ya mvimba  
Sa mu pesa nge kiese.

# 51 *Beto Me Kudipesaka na Nzambi!*

(Matayo 16:24)

1. Yehowa me bendaka beto na Kristu

Sa na kukuma balongoki.

Nsemo ya kieleka ke

Sema tuka na zulu.

Lukwikilu na beto

Me kumaa ngolo mpenza.

*(REFRAIN)*

*Beto me kudipesaka na Yehowa.*

*Beto ke zolaa yandi ti Yezu.*

2. Na kisambu beto me songaka Nzambi

Nde beto ta sadila yandi.

Yo ke kiese ya mingi,

Na kuvanda bambangi,

Kunata zina'a Nzambi,

Mpi kulonga kieleka.

*(REFRAIN)*

1. Sambu Yehowa gangaka  
Bima yonso mpenza,  
Ntoto, zulu, bima yonso  
Ke bisalu nandi.  
Yandi pesaka luzingu  
Na bigangwa yonso.  
Ee yo me fwana beto yonso,  
Kupesa yandi nkembo.
2. Yezu Kristu kubakaka  
Mbotika na masa.  
Yandi sambaa nde: 'Luzolo  
Na nge me kwi sala.'  
Mpi na nima ya mbotika  
Yandi kumaa Mesia,  
Na bulemfu mpi na kwikama  
Yandi sadilaka nge.
3. Yehowa beto me kwisa,  
Kupesa nge nkembo,  
Beto me pesaka nge mpi,  
Luzingu na beto.  
Nge pesaka Mwana na nge,  
Sa na beto yonso.  
Beto fwete zinga to kufwa,  
Kaka sa na nge Tata.



1. Ntongo me

Tana dezia

Beto fwete samuna.

Na nganda mvula

Mpi mudidi kele.

Kansi beto ke wa mpi nzala'a

kulala.

*(REFRAIN)*

*Bangindu ya mbote, kusamba,*

*Mpi kudibongisa*

*Le pesa beto ngolo sambu,*

*Beto nunga.*

*Beto kele ve beto mosi.*

*Bawanzio mpi kele.*

*Banduku'a mbote ta sala nde,*

*Beto nunga.*

## 2. Kubumba

Mambu yayi

Ta pesa beto kiese.

Nzambi ke monaa

Bikesa na beto,

Mpi yandi ke yibukaa zola

na beto.

*(Refrain)*

**“Yai Nzila”**  
(Yezaya 30:20, 21)

1. Ke ti nzila’a ngemba,  
Nzila’a nge me zaba.  
Yo ke nzila yina  
Ya nge longukaka,  
Na ntangu nge kuwaka  
Ndinga ya Yezu.  
Yayi nzila’a ngemba,  
Yo ke na Biblia.

**(REFRAIN)**

*Yayi nzila’a moyo Yayi nzila.  
Kumeka ve Kutala na Iweka!  
Nzambi ke tuba: ‘Yayi nzila;  
Kuzieta ve sambu yayi nzila.’*

2. Ke ti nzila’a zola,  
Kutala ve Iweka.  
Biblia me songaa  
Beto nzila yina.  
Zola ya Nzambi ke  
Mbote mpi masonga.  
Yayi nzila’a zola;  
Ya beto fwe landa.

**(Refrain)**

3. Ke ti nzila'a moyo,  
Kutala ve nima.  
Nzambi ke sila nde:  
Kele ve ti nzila,  
Ya nkaka ya mbote,  
Ya ngemba mpi'a zola.  
Yayi nzila'a moyo,  
Beto tonda Nzambi.

*(Refrain)*

1. Beno bansadi na mono,  
     Beno longa Kimfumu.  
 Beno tina ve mbeni.  
     Beno zabisa bantu  
 Nde Yezu yina ke yala,  
     Me losaka Diabulu,  
 Mpi kubika fioti yandi,  
     Ta kwi gulusa bantu.

*(REFRAIN)*

*Nge fwe tina ve bambeni,  
 Ata bo ke bangisa.  
 Sambu mono ta tanina  
 Bansadi ya kwikama.*

2. Ata bambeni na beno  
     Kele mingi to ngolo,  
 Ata bo seka beno,  
     Mpi bo kuvweza beno,  
 Beno bansadi na mono,  
     Beno wa bo ve boma,  
 Sambu mono ta tanina  
     Bantu yonso'a kwikama.

*(Refrain)*

3. Mono kele kitininu,  
Beno kuwa boma ve.  
Ata mbeni fwa beno,  
Mu ta vila beno ve.  
Kutina ve bantu yina  
Lenda fwa kaka nitu  
Kansi yina le kuka ve,  
Kufwa moyo na betu!

*(Refrain)*

1. Nzila ya mbote ke nzila ya kieleka,  
Muntu ve le zinga sa na nge.  
Yo yina landa ndongisila ya Nzambi;  
Ndima nde yo ke kieleka.

*(REFRAIN)*

*Zola kieleka.*

*Zitisa mpi landa yo.*

*Nzambi ta*

*Pesa nge kiese kana*

*Nge ke zola kieleka.*

2. Bikesa ya nge ke sala sa na Nzambi  
Mpi sambu na Kimfumu nandi  
Ta pesa nge luzingu'a kukonda nsuka,  
Mpi lusakumunu mingi.

*(Refrain)*

3. Nzambi fwe twadisa beto sa beto ke  
Bana-fiote na meso nandi.  
Yo yina tambulaka ti Tata Nzambi,  
Mpi baka mambote nandi.

*(Refrain)*

# 57 *Kusamuna na Bantu ya Mitindu Yonso* (1 Timoteo 2:4)

1. Beto fwete pona-ponaka ve,  
Bonso Nzambi na beto Yehowa.  
Luzolo nandi ke kugulusa  
Bantu ya mitindu yonso mpenza.

*(REFRAIN)*

*Kima ya mfunu kele*

*Muntu, ntima, luse ve.*

*Beto ke longaka bantu yonso.*

*Sa na zola ya nkweni,*

*Beto ke samunaka:*

*“Beno kuma banduku ya Nzambi.”*

2. Kisika ya beto ke zwaka bo  
Mpi mpila bo kele ke mfunu ve.  
Kima kele mfunu kele ntima—  
Mpila Nzambi ke tadilaka bo.

*(Refrain)*

3. Nzambi ke ndimaka bantu yina  
Ke buyaka mambu ya nsi-ntoto.  
Beto me longukaka yo mpi ke  
Zabisaka yo na bantu yonso.

*(Refrain)*



# 58 *Kusosa Banduku ya Ngemba* (Luka 10:6)

1. Yezu tubaa nde: 'Bo wa kieleka.'  
Konso ntangu yandi longaa,  
Bantu ndinga ya Yehowa.  
Yandi zolaka mameme'a Nzambi.  
Mpi sosaka bo katuka  
suka tii mpimpa.  
Na balabala, nzo na nzo,  
Beto ke longaka bo nde  
Bampasi yonso ta mana kibeni.

*(REFRAIN)*

*Beto fwete*

*Kusosa banduku ya ngemba,*

*Na nsi-ntoto,*

*Bisika yonso na makanda,*

*Sa Yehowa*

*Gulusa bo.*

2. Sambu ntangu ke landa kukwenda,  
Beto fwe landa kusosa Bantu  
sambu bo guluka.  
Beto fwe sala yo sa na zola.  
Beto lenda sansa ntima  
yina me lwala.  
Ntangu beto ke longaka,  
Kana muntu mosi ndima,  
Kiese ke pusaa beto na kufula.

*(Refrain)*

# 59

## *Beto Pesa Nzambi Nkembo*

(Nkunga 146:2)

### 1. Beto pesa

Nzambi nkembo!

Ya ke pesaa bima yonso'a mbote.

Konso mpimpa,

Konso mwini,

Beto fwe kumisa zina nandi,

Zola nandi, mpi ngolo na yandi.

### 2. Beto pesa

Nzambi nkembo.

Yandi ke sadisaka beto mpi

Ke pesaka

Beto ngolo;

Mpeve nandi ke taninaa beto.

Beto fwe tubila ngolo nandi.

### 3. Beto pesa

Nzambi nkembo.

Ya ke lunungu, ke pesaa ngolo.

Mambi, yandi

Ta katula.

Kimfumu ta sakumuna beto.

Beto kumisa yandi na kiese!

1. Bantu fwe zaba nde  
 kilumbu ya makasi  
 Ya Yehowa ta kwisa  
 mpi yo me finama.

*(REFRAIN)*

*Bo ta baka moyo kana  
 Bo lemfukila Nzambi.  
 Beto mpi ta baka moyo,  
 Yo yina beto fwe longa  
 Makanda.*

2. Beto fwete longa  
 bantu nsangu ya mfunu,  
 Mpi kulomba bo na  
 kuwakana ti Nzambi.

*(Refrain)*

*(PONT)*

Yo ke mfunu nde bo wa,  
 Bo longuka mpi bo zinga.  
 Beto ke longaka bo  
 Kieleka ya ke gulusaa.

*(Refrain)*

# 61 *Bambangi, Beno Kwenda na Ntwala!*

(Luka 16:16)

1. Na bilumbu yayi ya nsuka beto  
Fwe longa nsangu ya mbote ti kikesa.  
Diabulu ke nwanisa beto,  
Kansi Yehowa ke sadisa beto.

*(REFRAIN)*

*Bambangi, beno kwenda kaka na ntwala!  
Beni sala kisalu'a Nzambi ti kiese!  
Be longa nde Paladisuni me finama,  
Yo ta nata balusakumunu.*

2. Beto ke sosaa ve luzingu'a pete,  
Beto ke sepedisaka ve nsi-ntoto.  
Beto ke vandaa ntangu yonso,  
Ya kwikama mpi ya kukonda kifu.

*(Refrain)*

3. Bantu ke seka Nzambi mpi Kimfumu;  
Bo ke bebisa zina nandi ya santu.  
Beto fwe santisa yo mpenza,  
Mpi kulonga yo na makanda yonso.

*(Refrain)*

## *Nkunga ya Mpa* (Nkunga 98)

1. Yimbila Nzambi Nkunga ya kikesa, ya mpa.  
     Longa mambu yina Yandi ke salaka.  
     Kumisa Nzambi Sambu yandi ke nungaka,  
     Yandi ke sambisaa,  
     Na lunungu mpenza.

*(REFRAIN)*

*Beto fwe*

*Yimba nkunga ya mpa!*

*Yimba nde*

*Nzambi ke Ntotila.*

2. Beto yimbila Yehowa nkunga ya kiese!  
     Mpi beto kumisa Zina nandi'a nene.  
     Yimbila yandi Na kati ya bantu mingi.  
     Be kumisa yandi,  
     Na kidare, mpungi.

*(Refrain)*

3. Bika banzadi Yonso kukumisa Nzambi.  
     Bigangwa ya ntoto, Be kumisa yandi.  
     Bika banzadi Mpi bantoto kusepela.  
     Bangumba, miwanda  
     Be kumisa yandi.

*(Refrain)*

# 63 *Beto Ke Bambangi ya Yehowa!*

(Yezaya 43:10-12)

1. Bantu ke sambilaka  
Biteki ti matadi.  
Mpi bo me zaba ve,  
Nzambi'a kieleka.  
Banzambi yango lenda  
Kuzaba ve makwisa.  
Bo kele mpi ve ti bambangi,  
Sa bo kele ve banzambi.

*(REFRAIN)*

*Bambangi ya Yehowa,  
Ke longaa na kikesa.  
Nzambi ke lungisaka mambu  
Ya yandi ke silaka.*

2. Beto ke na kiese ya  
Kulonga zina'a Nzambi.  
Nsangu ya Kimfumu  
Beto ke longa  
Sa bantu zaba mpila  
Kieleka ke gulusaa.  
Kana bo yela bo ta kuka,  
Kuyimba nkunga'a lukumu.

*(Refrain)*

3. Kulonga zina'a Mfumu,  
Ke katulaa yo nsoni.  
Mpi yo ke kebisaa,  
Bantu'a masumu.  
Nzambi ta lolula bo,  
Kana bo soba ntima.  
Kudipesa ke pesaa beto  
Kiese, ngemba, mpi luzingu.

*(Refrain)*



# 64 *Beto Katula Bambuma na Kiese* (Matayo 13:1-23)

1. Beto ke zinga na bantangu,  
Ya kukatula bambuma.  
Mpi bambuma me yala mingi,  
Beto ke sala na kiese.  
Yezu mbandu na beto muntu,  
Ke twadisaka kosalu,  
Konso kilumbu beto ke sala  
Kosalu'a Mfumu na kiese.
2. Beto ke longaka sambu na  
Zola ya Nzambi mpi'a nkweni.  
Beto fwete sala yo nswalu,  
Sambu nsuka me finama.  
Beto ke vandaka na kiese,  
Ya kusala ti Yehowa.  
Lukwikilu ke pusaka beto  
Na kulonga tii na nsuka.

1. Kwendaka na ntwala sambu nge yela!  
Longa nsemo'a kieleka sa bantu temuka.  
Tomisa ksalu na nge'a bilanga;  
Tudila Nzambi ntima.  
Beto yonso lenda sala mpi,  
Ksalu ya Yezu salaka.  
Lomba Yehowa na kusadisa nge.  
Kangama na lunungu.
  
2. Kwendaka na ntwala mpi samunaka!  
Nsangu'a mbote na bantu ya mitindu yonso.  
Mpi kwisa beto kumisa Yehowa,  
Na ksalu'a nzo na nzo.  
Ata bambeni bangisa nge,  
Landa kusamuna na kiese,  
Nde Kimfumu ke na kuyala bubu.  
Kulemba ve kulonga.

3. Kwendaka na ntwala, landa kuyela  
Mpi tomisa mayele na nge ya kulonga,  
Landa lutwadisu'a mpeve ya Nzambi.  
Ya ta pesa nge kiese.  
Zola bantu ya nge ke longga,  
Mpi landa kuvutukila bo;  
Sadisa bo yonso sambu bo yela,  
Mpi bo zaba kieleka.

1. Kieleka yonso ya me tala Kimfumu  
Mpi Ntotila ya lusilu me zabana.  
Sambu na mawa mpi zola ya lunungu  
Nzambi tadilaka bampasi ya bantu,  
Mpi zengaka nde Yezu fwe yala ntoto;  
Kimfumu butukaa  
na ntangu'a ya tulaka.  
Yandi ta pesa Mwana na yandi nkento,  
Kibuka'a fioti ya yandi me ponaka.
2. Nsangu'a mbote me zabanaa banda ntama,  
Mpi Nzambi ke zola nde beto longi yo.  
Bawanzio ke salaa ti beto na kiese,  
Bo ke sadisaka beto na kulonga.  
Beto ke ti lukumu  
mpi mukumba ya  
Kukumisa mpi kusantisa zina'a Nzambi.  
Kuvanda mhangi'a Yehowa ke lukumu,  
Beto fwe longi bantu nsangu ya mbote.

1. Nzambi me pesaka nsiku,  
Beto yonso fwete zitisa yo.  
Nge fwe yilama na kulonga  
Kikuma ya kivuvu na beto.

*(REFRAIN)*

*Longa nsangu*

*Sambu bantu kuwa yo!*

*Longa yo,*

*Sa nsuka me finama.*

*Longa yo,*

*Sa bantu kuzaba yo.*

*Longa yo*

*Na nsi-ntoto!*

2. Bantangu’a mpasi ta vanda;  
Mpi kimbeni lenda nata nsoni.  
Ata bantu kubuya nsangu,  
Beto ke tula ntima na Nzambi.

*(Refrain)*

3. Bantangu’a mbote ta vanda,  
Mpi yo ta lomba nde beto longa  
Nzila yina ke gulusaka,  
Beto kumisa zina’a Yehowa.

*(Refrain)*

# 68 *Beno Kuna Nkeni ya Kimfumu* (Matayo 13:4-8)

1. Bampika'a Mfumu beno kwisa,  
Beno lemfukila yandi.  
Yandi ta sadisaka beno,  
Mpi ta songa beno nzila.  
Nkeni ya kieleka lenda buta  
Na bantima ya masonga.  
Yo yina beno sala na kwikama  
Kisalu na beno ya santu.
2. Sambu kisalu na nge nunga,  
Nge fwe kudipesa mingi.  
Sadisa bantu na kuzola,  
Mpi na kuzaba kieleka.  
Sadisa bo yonso na kununga  
Bampasi ti boma na bo.  
Nge ta wa kiese ntangu nge ta mona  
Bo ke yela na kieleka.

# 69 *Kwe Longa Kimfumu ya Nzambi!*

(2 Timoteo 4:5)

1. Kwe longa Kimfumu ya Nzambi  
Na bantu'a bansi yonso.  
Ti zola ya nkweni na ntima,  
Kwenda kusadisa bo.  
Longa nsangu'a mbote na kiese,  
Sambu yo kele dikabu.  
Kwenda kulonga bantu yonso  
Zina ya santu ya Nzambi.

*(REFRAIN)*

*Kwenda longa nsangu  
ti kikesa na ntoto'a mvimba.  
Vanda kaka ya kwikama  
na lweka ya Yehowa.*

2. Kibuka'a fioti mpi ya nene,  
Baleke ti bambuta.  
Beno fwete kwenda na ntwala  
Na kisalu ya Nzambi.  
Bantu yonso fwete wa nsangu  
Ya ke tadila Kimfumu.  
Nzambi ke pesaa beto ngolo,  
Beto fwete wa ve boma!

*(Refrain)*

1. Yezu pesaa mbandu mpi songaa beto,  
Mutindu beto fwe longa:  
'Beno sosa bantu yina me fwana,  
Yina ke na nzala'a kieleka.  
Kana bantu yango kundima beno,  
Bo lenda kuvanda na ngemba.  
Kana bo buya to bo kula beno,  
Beno fwe pupula makulu.'
2. Bantu yonso yina ke yamba beno,  
Bawu ke yamba mpi Yezu.  
Nzala na bo ya kubaka luzingu,  
Ta pusa bo na kuwa nsangu.  
Kudiyangisa ve sa na bangogo  
Sambu Nzambi ta sadisa nge.  
Mvutu ya mbote ta pesa kiese na  
Bantu ya kudikulumusa.



# 71 *Beto Kele Basoda ya Yehowa!* ( Yoele 2:7)

1. Beto ke basoda ya  
Nzambi mpi'a Kristu.  
Beto ke na bumosi  
Ata mbeni kele.  
Beto ke longa nsangu  
Bisika yonso;  
Beto ke lemba ve  
Ke wa ve boma.

*(REFRAIN)*

*Beto ke basoda ya  
Nzambi mpi'a Kristu,  
Beto ke longa nde,  
"Nzambi ke yala."*

2. Beto bansadi'a Nzambi,  
Beto ke sosa  
Mameme nandi yonso,  
Yina me vilaka.  
Beto ke sosaka bo  
Mbala na mbala  
Mpi ke bingaka bo  
na Nzo'a Kimfumu.

*(Refrain)*

3. Beto ke basoda ya  
Yehowa Nzambi;  
Beto me yilamaka  
Sambu na bitumba.  
Kansi beto fwe keba  
Mpi kulemba ve.  
Beto fwe tanina,  
Kieleka'a Nzambi.

*(Refrain)*

# 72 *Beto Zabisa Kieleka ya Kimfumu* (Bisalu 20:20, 21)

1. Ntete beto zabaka ve  
Nzila ya kuluta mbote.  
Yehowa tindaa mwini,  
Kieleka'a Kimfumu nandi.  
Buna beto bakisaka  
Mfunu'a kusadila Nzambi,  
Ya kukumisa yandi,  
Mpi zina nandi'a kuluta santu.  
Beto longa bantu yonso  
Na banzila mpi na banzo  
Kieleka ya ke katula  
Bantu yonso na kimpika.  
Mpi na konso nsi beto ta  
panza lusambu'a Yehowa.  
Beto sadila yandi  
Tii ntangu'a ta tuba yo me mana.

1. Beto ke longa Kimfumu  
Mpi zina na nge Nzambi.  
Bamingi ke menga beto,  
Ke pesa beto nsoni.  
Beto ke banga bo ve,  
Beto ke lemfukila nge.  
Yehowa pesa beto mpeve;  
Mpi wa kisambu na beto.

*(REFRAIN)*

*Pesa beto kikesa Yah;  
Sa beto nunga boma.  
Pesa beto ngolo Nzambi  
Sa beto longa bantu.  
Armagedoni ke kwisa,  
Na ntwala nde yo yantika,  
Pesa beto kikesa Yah  
Mpi wa beto.*

2. Ata beto le wa boma,  
Beto ta yambula ve.  
Beto ke tula ntima nde  
Nge ta bika beto ve.  
Nzambi tala bantu'a ke  
Niokula bansadi na nge.  
Yehowa pesa beto ngolo  
Ya kulonga zina na nge.

*(Refrain)*

*Beno Kwisa Kuyimba  
Nkunga ya Kimfumu!*  
(Nkunga 98:1)

1. Yayi nkunga'a kiese mpi ya kununga;  
Yo ke pesa Yehowa lukumu.  
Bangogo na yo ke pesa kivuvu.  
Beto yimba nkunga ya Kimfumu:

*(REFRAIN)*

*'Beno kwisa Kusambila.  
Mfumu Nzambi; Beno kwisa,  
Kulonguka nkunga yayi ya mfunu;  
Be fukama, be kumisa Nzambi.'*

2. Beto yimba nkunga'a mpa ya Kimfumu.  
Kristu Yezu ke yala nsi-ntoto.  
Kikanda mosi ya mpa me butuka:  
Bantu na yo ta yala ti Yezu:

*(Refrain)*

3. Bantu lenda bakisa nkunga yayi.  
Sambu yo ke pete mpi kitoko.  
Bantu mingi me longukaa yo dezia,  
Ebuna bo ke songa bantu nde:

*(Refrain)*

# 75 “Mono Yandi Yai, Tinda Mono!”

(Yezaya 6:8)

1. Bubu bantu ke finga mpi  
Ke vweza zina’a Yehowa.  
Bo ke tuba yandi ke nku  
Bankaka nde ‘Nzambi ke ve.’  
Nani ta kumisa yandi?  
Sambu bantu yonso kuwa?

## (REFRAIN 1)

*‘Mu yandi yayi tinda mu!  
Mu ta yimbila nge Mfumu.  
Yo ke lukumu sa na munu  
Mu’andi yayi tinda mu!’*

2. Bantu mingi ke tuba nde  
Yehowa ke sukinina.  
Bo ke sambila biteki;  
Mpi nzambi na bo Kaisali.  
Nani ta songa bantu’a mbi  
Mambu yina ta bwila bo?

**(REFRAIN 2)**

*'Mu yandi yayi tinda mu!  
Mu ta kebisa bo yonso.  
Yo kele kibeni lukumu  
Mu'andi yayi tinda mu!'*

3. Bantu'a mbote ke niokwama  
Sa mambi ke kuma mingi.  
Bo ke sosa na masonga  
Kuzwa kieleka mpi ngemba.  
Nani ta pesa bo ngolo?  
Sambu bo sosa lunungu?

**(REFRAIN 3)**

*'Mu yandi yayi tinda mu!  
Mu ta kwenda kulonga bo.  
Yo kele kibeni lukumu  
Mu'andi yayi tinda mu!'*



# 76 *Nge Ke Kudiwaka Nki Mutindu?*

(Baebreo 13:15)

1. Nge ke kudiwaka  
inki mutindu kana,  
Nge me samuna mpi me  
longa na kikesa?  
Nge me zaba mpi nde  
Nzambi ta sadisa nge.  
Yandi me zaba bantu  
ya ntima-masonga.

*(REFRAIN)*

*Beto ke waa kiese kana  
beto ke sadila Nzambi.  
Beto fwete kumisa yandi  
konso kilumbu.*

2. Nge ke kudiwaka  
inki mutindu kana  
Bantu ya ntima-mbote  
kundima kieleka?  
Ata bantu buya,  
Beto ke vandaa kaka  
na kiese ya kunata  
Zina ya Yehowa.

*(Refrain)*

3. Nge ke kudiwaka,  
inki mutindu mpila,  
Nzambi ke sadisaa nge  
na ksalu nandi?  
Nge fwe longa bantu  
na kiese mpi mawete  
Sambu ntama mingi ve  
ksalu ta suka.

*(Refrain)*

# 77 *Nsemo na Nsi-Ntoto ya Mpimpa* (2 Bakorinto 4:6)

1. Na ntangu yayi ya mpimpa  
Nsemo ke monana  
Sambu na kumonisa nde  
Suka me finama.

*(REFRAIN)*

*Nsangu na beto ke  
Sema ngolo na mpimpa.  
Yo ke pesa bantu  
Kivuvu ya ngolo,  
Mpi yo ke katulaka  
Mpimpa yonso.*

2. Beto fwete tedimisa  
Bayina ke lala.  
Beto fwe pesa bo yonso,  
Ngolo mpi kivuvu.

*(Refrain)*

1. Balongi ya Ndinga'a Nzambi  
Ke vandaa na kiese.  
Bo ke bakaka mambote  
Ya kuluta mingi.  
Beto ke landaka Yezu  
Mpi zola na yandi.  
Nzambi ke bendaka bantu ya  
Beto ke longaka.
2. Sambu beto ke balongi  
Beto fwe salaka,  
Mambu'a mbote mpi'a kieleka  
Kaka bonso Nzambi.  
Beto ke longukaa Bible,  
Na dikebi mpenza.  
Sambu na kulonga bankaka,  
Beto kudilonga.
3. Nzambi ke sadisaa beto  
Na kulonga Bible.  
Yandi ta wa kana beto,  
Lomba lusadisuu.  
Beto ke zolaa mambu'a ke  
na Ndinga ya Nzambi.  
Bantu yina beto ke longaa,  
Ta kuma balongi!

# 79 *Longa Bo na Kutelama Ngolo*

(Matayo 28:19, 20)

1. Kulonga mameme'a Yehowa  
Ke pesaa beto kiese.  
Yandi ke sadisaka bawu  
Na kuzola kieleka.

*(REFRAIN)*

*Yehowa Nzambi wa beto  
Mpi landa na kukeba bo.  
Tata beto ke samba nge: Sadisa bo;  
Bika bo telama ngolo.*

2. Beto ke sambaka sa na bo  
Kana bo ke mekama.  
Bo yonso me kumaka ngolo  
Sa nge ke sakumuna.

*(Refrain)*

3. Bo fwete tula mpenza ntima,  
Na Nzambi mpi na Mwana.  
Bulemfu ti kukanga ntima,  
Ta sala nde bo nunga.

*(Refrain)*

*'Meka mpi Mona nde  
Yehowa Ke Mbote'*  
(Nkunga 34:8)

1. Beto ke zolaka mingi  
Kisalu ya kusamuna.  
Beto ke sumbaka ntangu sambu,  
Na kulonga bantu mingi.

*(REFRAIN)*

*Nzambi ke tuba: Kwi meka mpi—  
Mona nde mu ke mbote.'*  
*Kukangama na Nzambi kele,  
Kimvwama mosi'a nene.*

2. Bansadi ya ntangu yonso  
Kele na bimvwama mingi.  
Bo ke vandaka na kiese sa bo  
Ke tulaa ntima na Nzambi.

*(Refrain)*

# 81 *Luzingu ya Mupasudi-Nzila* (Longi 11:6)

1. Baluse ti mpongi beto ke telama,  
Na nsuka na ntwala  
ntangu basika mpi ke samba.  
Beto ke na kiese ya kulonga bantu.  
Bo ndima to bo buya,  
beto ke landa kulonga.

*(REFRAIN)*

*Yina luzingu ya  
Beto me ponaka.  
Beto ke zinga sa na Tata.  
Beto ke lemba ve,  
Ata nki mutindu.  
Yo ke songa nde beto ke “zolaka nge.”*

2. Ata na nkokila ngolo ke ve mingi,  
Na ntima beto ke  
na kiese mpi beto ke samba.  
Yina luzingu ya beto ke zolaka.  
Sambu na yo beto ke tondaka  
Tata, Yehowa.

*(Refrain)*

# 82 “Bika nde Nsemo na Beno Kusema”

(Matayo 5:16)

1. Yezu tubaka nde  
Nsemo na beto,  
Kusema na meso  
Ya bantu yonso.  
Na nzila’a Biblia,  
Bantu ke waka,  
Mambu’a ke bwisa ntima  
Mpi mambu’a ngemba.
2. Bantu yonso fwe wa  
Nsangu’a Kimfumu;  
Yo fwe pela ntangu  
Beto ke longa.  
Nsemo’a Biblia ke  
Twadisaa beto  
Ntangu beto ke longa  
Bantu kieleka.
3. Beto fwete sala  
Mambu ya mbote,  
Sa na kutomisa  
Nsangu na beto.  
Nsemo na beto fwe  
Landa kupela,  
Sambu beto kupesa  
Yehowa kiese.



1. Nzo na inzo kwenda longa,  
Nsangu ya Yehowa.  
Na babwala kwenda disa,  
Mameme ya Tata.  
Mutindu Yezu tubaka,  
Bakristu ke longa,  
Nde Kimfumu ya Yehowa  
Kele na kuyala.
2. Nzo na inzo kwenda longa,  
Nsangu’a luguluku  
Na bantu ya fwete binga  
Zina ya Yehowa.  
Nki mpila bo le zitisa  
Muntu’a bo zaba ve?  
Kwenda longa zina nandi  
Na bisika yonso.
3. Na konso kielo beto fwe  
Longa nsangu’a mbote.  
Kansi muntu yandi mosi,  
Fwe baka lukanu.  
Beto yonso fwete longa,  
Zina ya Yehowa.  
Nzo na nzo beto ta kuta,  
Mameme na yandi.

## Kuzola

(Matayo 9:37, 38)

1. Yehowa me zaba mambu  
     Ya le pesa beto kiese.  
 Yandi me pesaa bisalu  
     Mingi ya beto fwe sala.

*(REFRAIN)*

*Zola ya Yehowa,  
     ke pusaa beto  
 Na kwenda kusala kisika  
     mpusa ke mingi.*

2. Kisika ya mpusa kele  
     Beto fwe kwenda kusala.  
 Sa na zola beto yonso  
     Ke vukana, ke sadisa.

*(Refrain)*

3. Beto ke na kumeka mpi  
     Bametode mingi ya mpa.  
 Beto ke na kulonguka  
     Bandinga'a mpa mpi ke tunga.

*(Refrain)*

1. Beto ke yambaka bantu yina  
Me kwisa kuwa Ndinga'a Nzambi.  
Yandi ke longa beto kieleka  
Mpi beto fwe ndima yo na ntonda yonso.
2. Beto ke tonda Nzambi sambu na  
Bampangi ya ntima ya mbote.  
Beto landa kuzola bo yonso  
Mpi kuyamba bantu ya me kwisa awa.
3. Nzambi ke binga bantu'a masonga,  
Sa bo kwi longuka kieleka.  
Yandi muntu ke bendaka beto.  
Yo yina beto fwete yambana mpenza.

*Bo Fwe Longa Beto*

(Yezaya 50:4; 54:13)

1. Beno kwi longuka mambu ya Yehowa.  
Mpeve ke tuba, 'Be kwi nwa masa.'  
Beno bantu'a ke zolaa kieleka.  
Beno kwi landa malongi'a Nzambi.
2. Beto tinaka ve balukutakanu  
Sa bo fwe longa beto kieleka.  
Bampangi mpi mpeve kele awa,  
Awa beto ke bakaa kikesa.
3. Kuwa bantu ke yimba ke pesaa ngolo!  
Mingungu na bo kele kitoko!  
Vukanaka ti bantu ya Nzambi!  
Ee, vandaka ntangu yonso ti bo!

1. Nsi-ntoto me fuluka ti bantu'a nku,  
Yina me zaba Nzambi ve.  
Sa beto le nunga ve beto mosi,  
Nzambi fwe twadisa beto.  
Balukutakanu ke kumisaka  
Lukwikilu ngolo mingi.  
Yo ke pusaka na mambu ya mbote,  
Mpi ke pesaka kikesa.  
Beto fwe sala luzolo ya Nzambi  
Mpi kuzitisa bansiku.  
Balukutakanu ke longaa beto,  
Mpi ke pusaka na zola.
2. Nzambi me zaba bampusa na beto;  
Mpi beto fwe wila yandi.  
Beto fwe kwenda balukutakanu  
Mpi kundima Ndinga'a Nzambi.  
Bo ke longaka beto mutindu ya  
Kumonisa lukwikilu.  
Sa bampangi ke sadisaka beto,  
Beto ke ve beto mosi.  
Beto fwe vukanaka ti bo yonso,  
Mpi kuingila Yehowa.  
Balukutakanu ke sadisaa na  
Kubaka mayele'a Nzambi.

1. Yehowa beto me vukana awa,  
Na emvitasio na nge Tata.  
Ndinga na nge kele nto ya malongi,  
Mpi yo kele mwinda na beto.

*(REFRAIN)*

*Longaka mono banzila na nge;  
Bika mu landa bansiku na nge.  
Sadisa mu na kutambula na  
Nzila ya mbote mpi ya kieleka.*

2. Mayele na nge ke ya kuzanguka,  
Nge ke sambisaa na lunungu.  
Ndinga na nge ke yitukisaa beto;  
Mpi yo ke zingaa kimakulu.

*(Refrain)*

1. Bantu ya me waka malongi'a Kristu  
Fwe songa yo na luzingu na bo.  
Kansi Nzambi ta sakumuna beto,  
Kana beto ke lemfukila yo.

*(REFRAIN)*

*Widikila, lemfuka*

*Ntangu Nzambi ke tuba.*

*Sambu nge zwa kiese mpi kupema,*

*Widikila, lemfuka.*

2. Sambu beto kununga na luzingu  
Beto fwe tunga yo ve na zelo.  
Kana beto landa malongi'a Yezu,  
Yo ta vanda ti fondasio'a ngolo.

*(Refrain)*

3. Mutindu nti ya ke mena na masa  
Ke butaka mbuma konso nsungi  
Kulemfukila Nzambi ta natila,  
Beto mambote'a mvula na mvula.

*(Refrain)*

1. Beto ke pesana kikesa  
 Ya kusala na kwikama.  
 Bisalu ya mbote ke nataa  
 Zola, bumosi mpi ngemba.  
 Zola'a bampangi ke pesaka  
 Ngolo ya kukanga ntima.  
 Dibundu kele kitininu,  
 Kisika ya kubumbana.
  
2. Yo ke bwisaa ntima na kuwa  
 Bangogo ya mbote mpenza!  
 Beto ke waa bangogo yina  
 Na bampangi ya kwikama.  
 Kusala ti bampangi kele  
 Mbote mpi ke pesaa kiese!  
 Beto fwe pesana kikesa  
 Mpi kusadisana mpenza.
  
3. Ti meso'a lukwikilu beto  
 Ke mona kilumbu'a Nzambi.  
 Balukutakanu ke mfunu  
 Sa beto vila ve nzila.  
 Beto ke zola kusala ti  
 Bampangi mvula na mvula.  
 Beto fwe pesana kikesa  
 Ya kubikala kwikama.



1. Yehowa ntangu yayi,  
Beto yonso ke samba nge.  
Nge me pesaa beto lukumu  
Ya mingi mpenza!  
Nge ke sakumunaka  
Kisalu na betu'a zola.  
Beto ke mona yo mpi bubu,  
Nzo me tungama.

*(REFRAIN)*

*Yehowa kutungila nge nzo  
Vandaka dibaku'a nene.  
Be ta sadilaka nge luzingu ya mvimba  
Mpi ta pesaa nge lukumu.*

2. Beto kele na kiese,  
Sa beto me zwa banduku!  
Mpi beto ta yibukaka bo  
Mvula na mvula!  
Beto salaa kumosi,  
Na lusadisu ya mpeve.  
Yo ke yika lukumu mpenza  
Na zina na nge!

*(Refrain)*

# 92 *Kisika ya Kele na Zina na Nge* (1 Bansangu 29:16)

1. Yehowa kutungila nge nzo,  
Kele lukumu ya nene!  
Beto ke pesa nge yo bubu  
Sambu na lukumu na nge.  
Yonso ya beto le pesa nge,  
Kele ya nge banda ntama.  
Beto ke pesa bima yonso  
Na kiese, na ntima'a mvimba.

## *(REFRAIN)*

*Nzambi beto ke pesa nge  
Nzo yayi ya Kimfumu.  
Beto ke pesa yo na nge  
O Yehowa ndima yo.*

2. Tata beto fwete fulusa  
Nzo yayi ti nkembo na nge.  
Bika bantu kwisa samba nge,  
Bo zaba banzila na nge.  
Kisika yayi kele ya nge,  
Beto ta taninaka yo.  
Bika nzo yayi ta kimbangi  
Mpi bantu kundima nsangu.

## *(Refrain)*

# 93 *Sakumuna Balukutakanu na Beto*

(Baebreo 10:24, 25)

1. O Yehowa sakumuna  
Lukutakanu yayi.  
Bika mpeve santu na nge,  
Kuvanda mpi ti beto.
2. Mfumu sadisa beto na  
Kusambila nge mbote.  
Ee pesa beto formasio  
Na kisalu'a kulonga.
3. Tata pesa beto ngemba  
Mpi sakumuna beto.  
Bika bisalu na beto  
Kupesa nge lukumu.

# **94 Ntonda Sambu na Ndinga ya Nzambi**

(Bafilipi 2:16)

1. Yehowa beto ke tonda nge mingi  
Sa nge me pesaa beto Ndinga na nge!  
Masonuku yonso kele ya kupemama.  
Yo ke pesaa mayele mpi kimpwanza.
2. Ndinga na nge ke simbaa mpenza ntima.  
Ke kabisaa mabanza ti bangindu.  
Bansiku na nge ke pwelele, ya kukuka.  
Minsiku na nge ke twadisaa beto.
3. Tata Ndinga na nge ke simbaa ntima.  
Baprofete va bantu bonso beto.  
Pesa beto lukwikilu ya ngolo mingi.  
Mersi Yehowa sambu na Biblia!

# 95 *Nsemo Kusema Diaka Mingi* (Bingana 4:18)

1. Baprofete sosaa kuzaba Kristu,  
Kivuvu ya bigangwa yonso.  
Mpeve songaa bo nde Mesia ta kwisa,  
Sambu na kugulusa beto.  
  
Yandi ke na kuyala ntangu yayi,  
Banzikisa ke monana.  
Kuzaba yo ke pesaa beto kiese;  
Bawanzio mpi ke zolaka yo!

*(REFRAIN)*

*Nzila na beto ke sema mpi,  
Nsemo ke landa kusema.  
Tala mambu Nzambi ke songa;  
Yandi ke twadisa beto.*

2. Mfumu me tulaka mpika'a kwikama,  
Sa na kupesa beto madia.  
Nsemo ya kieleka ke kuma mingi,  
Mpi yo ke sepedisa ntima.  
  
Nzila na beto ke kuma pwelele,  
Mpi beto ke mona mbote.  
Mersi Yehowa, nge nkwa ya kieleka,  
Beto ke na ntonda ya mingi.

*(Refrain)*

# **96 Mukanda ya Nzambi Kele Kimvwama**

(Bingana 2:1)

1. Kele ti buku mosi ya kitoko,  
Ke pesaa ngemba, kiese, kivuvu.  
Bangindu na yo ke na ngolo mingi,  
Yo ke pesaka “bafwa” luzingu.  
Mukanda yango ke Ndinga ya Nzambi.  
Bantu sonikaka yo vandaka  
Bantu ya va zola Yehowa mingi,  
Mpeve vandaka kutwadisa bo.
2. Bo tubilaka lugangu ya Nzambi,  
Mutindu yandi salaka bima.  
Mpila muntu va ntete ya kukuka,  
Mpi mpila Paladisu vilaka.  
Bo tubilaka diaka wanzio mosi  
Yina tulaka ntembe ti Nzambi.  
Yo me nataka mpasi mpi disumu,  
Kansi ntama ve Nzambi ta nunga.

3. Yayi ntangu ya kuvanda na kiese:  
Nzambi ke yala na nzila'a Yezu.  
Bubu beto ke long'a nsangu'a mbote  
Nde Kimfumu ta nata mambote.  
Nsangu yayi ke na mukanda'a Nzambi,  
Yo kele bonso bima ya kudia.  
Yo ke pesaka ngemba ya kieleka;  
Yo me luta mikanda ya nkaka.

97

*Beto Ke Zingaka Sambu na  
Ndinga ya Nzambi*  
(Matayo 4:4)

1. Luzingu me simbama na  
Ndinga ya Yehowa.  
Kima'a mfunu ke ve mampa  
Kansi Ndinga nandi.  
Beto kele na ngemba mpi  
Ta baka mambote.

*(REFRAIN)*

*Luzingu me simbama na  
Ndinga ya Yehowa.  
Yo ke pesaa beto ngolo'a  
Kusadila Nzambi.*

2. Biblia ke tubilaka  
Bantu'a lukwikilu.  
Bantu ya ntangu ya ntama—  
Bo vandaa kwikama.  
Masolo na bo ke pesaa  
Kikesa ya mingi.

*(Refrain)*



3. Kutanga Ndinga ya Nzambi,  
Ke pesaa kivuvu.  
Kana bampasi basika,  
Yandi ke pesaka  
Mayele'a kunwana ti yo.  
Beto fwe zola yo.

*(Refrain)*

*Masonuku Kele ya  
Kupemama na Nzambi*  
(2 Timoteo 3:16, 17)

1. Biblia ke sema ngolo,  
Yo ke twadisa beto.  
Kana beto kulanda yo,  
Beto ta baka kimpwanza.
2. Yo kele ya kupemama  
Mpi ke longaka beto.  
Yo ke songaa beto mpila  
Ya kulonga, kusungika.
3. Yo ke sadisaa beto na  
Kuzaba zola nandi.  
Kana beto ke tanga yo,  
Beto ta vila ve nzila.

# 99 *Bimvuka Mingi ya Bampangi* (Kusonga 7:9, 10)

1. Bimvuka mingi'a bampangi,  
Ya bantu ke mona,  
Bo yonso ke bampangi,  
Ya kwikama mpenza.  
Beto kele bamilio  
Mpi ke kuma mingi,  
Na makanda yonso beto ke  
Kumisaka Nzambi.
2. Bimvuka mingi'a bampangi  
Ke na kusamuna  
“Nsangu ya mbote yina,”  
Bantu fwete kuwa.  
Ata bantangu'a nkaka  
Beto ke lembaka,  
Yezu ke pesaa beto yonso,  
Ngemba mpi kupema.
3. Bimvuka mingi'a bampangi  
Ke sambila Nzambi,  
Na mpimpa mpi mwini na  
Kibansala nandi.  
Beto kele mafunda  
Mpi ke longa nsangu.  
Beto me kumaka kusala  
Kumosi ti Nzambi.

1. Yehowa ke yambaka bantu yonso.  
Yandi ke pona-ponaka ve bantu.  
Yandi ke pesaka ntangu ti bamvula,  
Madia'a kitoko mpi ya mbote.  
Kana beto sadisa bansukami,  
Beto ta fulula Nzambi na beto.  
Mpi yandi ta futa beto yonso sa na  
Bumbote na beto'a masonga.
  
2. Beto me zaba ve nki le salama  
Kana beto sadisa bansukami.  
Beto ke lungisaa mpenza nzala na bo  
Ata bo yonso ke banzenza.  
Bonso Lidia beto ke songaka bo:  
'Be kwisa kuvanda na nzo na mono.'  
Tata na beto me zaba bantu yina  
Ke fulula mawa na yandi.

1. Yehowa me vukisaka  
    Beto na kimvuka nandi.  
    Beto kele na bumosi,  
    Na ngemba mpi kiese.  
    Bumosi ke mfunu,  
    Yo ke mpi mbote.  
    Beto ke sadila Nzambi  
    Na lutwadisu ya Yezu.  
    Beto fwe zitisa yandi,  
    Na bumosi mpenza.
  
2. Beto kele na bumosi,  
    Ngemba, zola, mpi mawete.  
    Kana zola kele mingi  
    Ngemba mpi ta vanda.  
    Yo ke pesaa kiese,  
    Yo ke mpi mbote.  
    Kana beto ke ti zola,  
    Beto ta zinga na ngemba.  
    Beto ta sadila Nzambi  
    Na bumosi mpenza.

# 102      *'Sadisa Bayina Me Lemba'*

(Bisalu 20:35)

1. Beto yonso ke vandaa  
    Ti bifu mingi.  
    Ata mpidina Nzambi,  
    Ke zolaa beto.  
Yandi ke Tata ya  
    Mawa mpi ya zola.  
    Bonso yandi, beto fwe  
    monisa zola.
2. Beto lembika bantu  
    Yina me lemba.  
    Beto fwete pesa bo,  
    Kikesa mpenza.  
Bo ke bantu'a Nzambi,  
    Yandi ke pesaa bo  
    Mpeve sambu bo kuma  
    Ngolo, kikesa.
3. Beto fwe bedisa ve,  
    Bantu'a me lemba.  
    Beto fwe pesaka bo  
    Ngolo, kikesa.  
Beto fwe sadisa  
    Bo yonso na zola,  
    Kupesa bo kikesa,  
    Na ntima'a mvimba.

# 103 *Bangungudi Ke Makabu ya Bantu* (Baefezo 4:8)

1. Yehowa me pesaka beto  
Bangungudi'a zola,  
Sambu bo keba beto mpi bo  
Songa beto nzila.

*(REFRAIN)*

*Yehowa me pesaka beto,  
Bampangi ya kwikama.  
Bo ke taninaka mameme;  
Beto fwete zola bo.*

2. Bangungudi ke zolaa beto,  
Na masonga yonso.  
Mpi bo ke twadisaka beto,  
Na mawete yonso.

*(Refrain)*

3. Bo ke pesaa bandongisila,  
Sa beto vila ve.  
Bo ke sadisaka beto na  
Kusadila Nzambi.

*(Refrain)*

# ***104 Mpeve Santu Kele Dikabu ya Nzambi***

(Luka 11:13)

1. Nzambi'a ntima-mawa nge ke nene,  
Kuluta bantima na beto.  
Pardo lembika mpasi na beto,  
Pesa beto mpeve santu na nge.
2. Tata, sambu na masumu bantu  
Le monisa ve nkembo na nge.  
Pesa beto mpeve santu na nge  
Yo twadisa beto na luzingu.
3. Mpeve na nge ke pesaka beto  
Ngolo kana beto me lemba.  
Pesa beto ngolo ya ngo-zulu  
Mpi pesaka beto mpeve na nge.



1. Nzambi ya zola ke tuba:  
‘Zola nzila na mono.’  
Kuzola Nzambi mpi nkwenso  
Fwete pusaka beto,  
Na kusala mambu’a mbote  
Na luzingu na beto.  
Zola’a Kristu ke manaa ve,  
Beto fwe monisa yo.
2. Zola’a Nzambi ke pusaka  
Na kuzola mpi bantu.  
Kana beto bwa Yehowa  
Ta tedimisa beto.  
Zola ke waa ve kimpala,  
Yo kele ntima-mbote.  
Beto fwe zola bampangi,  
Beto ta zwa mambote.
3. Beto yambula makasi,  
Yo yala beto mpi ve.  
Beto sosa lutwadisusu  
Mpi malongi ya Nzambi.  
Kuzola Nzambi mpi nkwenso,  
Yo yina mpenza zola.  
Beto fwete zola bantu  
Na masonga, na ntima.

1. Beto ke samba sambu beto  
    Monisa bikalulu'a Nzambi.  
Kansi zola me luta yonso,  
    Yo ke katukaka na mpeve.  
Kana zola na beto mana,  
    Mayele na beto ke mpamba.  
Zola na beto fwe monana  
    Na bangogo mpi na bisalu.
  
2. Zola ke sosaka kukaba  
    Mpi yo ke vandaka ve bwimi.  
Zola ke mengaka ve bantu.  
    Beto fwe lolulaka bantu.  
Zola ke vandaka ntima-nda,  
    Yo ke vandaka ngolo mpenza,  
Yo ke nungaa bampasi yonso,  
    Yo ta mana ve ata fioti.

# 107      *Mbandu ya Zola ya Nzambi* (1 Yoane 4:19)

1. Yehowa ke longaka beto zola  
    Yandi kele mbandu.  
    Yandi ke songa mutindu beto fwe  
    Monisaka zola nandi.  
    Yandi pesaka Yezu sambu yandi  
    Lolula masumu na beto yonso.  
    Yo ke monisaa—zola nandi'a nene!  
    Bisalu na yandi ke zola.
  
2. Zola na beto sambu na bampangi  
    Fwe vanda kieleka,  
    Yo fwe pusa beto na kukeba bo,  
    Kansi kupona-pona ve.  
    Beto fwe zola Nzambi mpi bampangi,  
    Yina ke zola ya masonga mpenza.  
    Beto fwete lolula bifu na bo,  
    Beto fwete monisa zola.
  
3. Zola'a Nzambi ke vukisaka beto.  
    Beto ke bampangi.  
    Tata na beto ke songa beto nde:  
    “Beno zinga na bumosi.”  
    Beno monisa zola ya masonga.  
    Bible ti mpeve ke tomisaa beto.  
    Bampangi yonso ke yibusaa beto:  
    Yehowa ke Kibeni zola.

# 108      *Zola ya Kwikama ya Nzambi*

(Yezaya 55:1-3)

1. Yehowa ke zola.

Mpi beto ke monaka yo.  
Na nzila ya Mwana na nge,  
Nge me futaka nkudulu,  
Yo ke pesaka kivuvu  
Ya luzingu ya kitoko.

*(REFRAIN)*

*Beno'a ke sosa masa,  
Be kwi nwa masa'a moyo.  
Beno kwisa kumona,  
Zola ya Yehowa.*

2. Yehowa ke zola.

Bima ya nge me salaka  
Ke monisaa zola na nge.  
Nge mosi me pesaa Yezu  
Sambu balukanu na nge  
Kulungana mbote-mbote!

*(Refrain)*

3. Yehowa ke zola.

Bika mpeve pusa beto  
Na kuzola bantu'a mbote.

Bo fwe longuka kieleka.  
Beto fwe sadila Nzambi  
Mpi kulonga ti kikesa.

*(Refrain)*

*Beto Zolana Ngolo  
na Ntima ya Mvimba*  
(1 Piere 1:22)

1. Kana zola kele ngolo,  
Nzambi ta vanda na kiese.  
Zola kele kikalulu  
Ya me luta yonso.  
Yo ke katukaa na ntima,  
Yo ke yedisaa kinduku.  
Zola kele ve ti bwimi,  
Mpi yo ke masonga.

Beto ke sadisaka,  
Banduku yina ke na mpasi.  
Beto le kuma mpenza,  
Banduku ya masonga.

Yezu tendulaka zola,  
Yandi sadisaka beto,  
Na kumona zola nandi.  
Beto fwete zolana  
Ngolo na ntima'a mvimba.

1. Bidimbu yonso ke na kumonisa  
Kimfumu ke na kuyala.  
Beto fwete tedimisa ntu sambu  
Luguluku me finama!

**(REFRAIN)**

*Kiese’a Nzambi ke ngolo na beto.*

*Beto fwe yimba na kiese.*

*Beto fwete sepela na kivuvu,*

*Mpi beto fwe kumisa Nzambi.*

*Kiese’a Nzambi ke ngolo na beto.*

*Beto fwe sala na kiese.*

*Bantu yonso fwete zaba bunene*

*Ya Yehowa Nzambi na beto.*

2. Beno bantu ya ke zolaka Nzambi,  
Beno fwete wa ve boma.  
Beno telama sa na kuyimbila  
Yehowa nkunga ya kiese!

**(Refrain)**

1. Bikuma ya kiese na beto  
Ke landa kaka kumata.  
Bima ya mfunu ya makanda  
Ke kwi vukana ti beto.  
Kiese na beto me simbama  
Ngolo na Ndinga ya Nzambi.  
Konso lumbu beto ke bakaa  
Malongi ya yo ke pesaa.  
Bikuma ya kiese na beto  
Ke pela ngolo na ntima.  
Ata mpasi kubwila beto,  
Beto ta kangaka ntima.

*(REFRAIN)*

*Nzambi ke kiese na beto,  
Bisalu nandi ke nene,  
Mabanza nandi kele mudindu,  
Yandi ke ngolo mpi nene!*



2. Beto ke talaka ti kiese,  
Zulu, ntoto, mpi banzadi.  
Kana beto tala lugangu,  
Beto ke kumisaa Nzambi.  
Bubu beto ke na kulonga  
Kimfumu na nge Yehowa.  
Nsangu ya kubutuka na yo,  
Beto ke mwanga ti kiese.  
Kiese'a kimakulu ke kwisa,  
Bonso ntongo ke tanaka.  
Ntoto ti zulu'a mpa ta nata  
Kiese ya mvula na mvula.

*(Refrain)*

# 112      *Yehowa, Nzambi ya Ngemba* (Bafilipi 4:9)

1. Yehowa nge muntu,  
    Me silaa beto ngemba.  
Pesa beto mpeve na nge;  
    Yo buta mbuma mingi.  
Beto me kumaka,  
    Banduku na nge sambu,  
Na lukwikilu na Yezu;  
    Beto kele na ngemba.
  
2. Mpeve santu na nge  
    Ke sadisaka beto;  
Yo ke twadisaka beto  
    Na mpimpa ya nsi-ntoto.  
Tii ntangu bamvita,  
    Mpi bampasi ta mana,  
Sadisa beto Yehowa  
    Na kutanina ngemba.
  
3. Nge me vukisaka  
    Bantu ya ke zolaa nge,  
Sambu na kulonga bantu  
    Nde Kimfumu ke yala.  
Ntama ve Kimfumu  
    Ta sukisa bitumba.  
Mpi beto ta zingaka na  
    Ngemba mvula na mvula.

1. Kumisaka Yehowa,  
Nzambi ya ngemba.  
Sa yandi ta sukisa,  
Bitumba yonso.  
Mwana na yandi Kristu,  
Ke Mfumu'a ngemba.  
Yandi ta pesa beto,  
Ngemba'a kukuka.
2. Beto me yambulaka,  
Makasi yonso.  
Beto me kumisaka,  
Minduki nsengo.  
Beto fwe lolula sa  
Ngemba kuvanda.  
Mpi beto fwete zinga  
Kaka na ngemba.
3. Nzambi ke pesa beto,  
Ngemba na yandi.  
Beto ke zitisaka  
Bansiku nandi.  
Beto fwe songa bantu,  
Bo landa beto  
Tii kilumbu Kimfumu  
Ta tula ngemba.

## 1. Yehowa ke kikesa

Sa na zina nandi'a santu.  
Mpusa na yandi kele  
Ya kukatula yo mvindu.  
Yandi me kangaa ntima,  
Banda bamvula mingi;  
Me songaka ntima-nda  
Kukonda kulemba.  
Luzolo nandi ke nde  
Bantu yonso kuguluka.  
Ntima na yandi ya nda  
Ke vandaka ve ya mpamba.

## 2. Ntima-nda ke sadisaa

Na kukangama na Nzambi.  
Yo ke bwisaka ntima,  
Yo ke bumbaa ve makasi.  
Yo ke sosaka mambu  
Ya mbote ntangu yonso.  
Na bantangu ya mpasi,  
Yo ke pesaa ngolo.  
Ti bikalulu yina  
Mpeve santu lenda pesa,  
Yo ta sadisa beto  
Na kufulula Yehowa.

*Ntonda Sambu na  
Ntima ya Nda ya Nzambi*  
(2 Piere 3:15)

1. Yehowa nge ke ngolo mingi,  
Nge ke zolaa mambu'a mbote.  
Mambi ke mingi na ntoto,  
Yo ke pesaa beto mpasi.  
Kansi nge ke sukinina ve;  
Mpi ntima-nda na nge ta suka.

*(REFRAIN)*

*Beto ke kinga nge Nzambi,  
Mpi ke kumisa zina na nge.*

2. Sambu na nge bamvula fundu,  
Ke bonso kilumbu mosi.  
Kilumbu na nge ya nene,  
Ta kwisa na ntangu na yo.  
Nge ke waka kibeni kiese,  
Kana bantu balula ntima.

*(Refrain)*

1. Yehowa beto ke kumisa nge,  
Sambu ata nge ke  
Mpenza mayele mpi ngolo mingi,  
Nge kele mpi ntima-mbote.
2. Yezu mpi ke zola kusadisa  
Bantu'a ke niokwama.  
Vangu na yandi kele mpasi ve,  
Mpi yandi ke mbote mingi.
3. Nzambi mpi Yezu ke longa beto  
Bikalulu'a mbote.  
Kana beto kele ntima-mbote  
Be ta sadisa bampangi!

1. Nzambi ya bumbote nge me  
Sakumunaka beto!  
Nge ke santu mpi kwikama,  
Nge kele mbote mingi.  
Nge ke lolulaka beto,  
Na kiteso ya nene.  
Yo yina beto yonso ke  
Sadila nge na kiese.
2. Bantu na nge ke monisa  
Bumbote na nge Tata,  
Na bikalulu na bo mpi  
Na kisalu'a kulonga.  
Malongi na nge ke buta  
Mbuma na bansi mingi.  
Bika bumbote mpi mpeve,  
Na nge twadisa beto.
3. Beto ke monisilaka  
Bampangi ntima-mbote.  
Beto ke zolaa bo mingi  
Kuluta bantu'a nkaka.  
Nge ke sakumuna beto,  
Mpi ke sadisa beto,  
Na kusala mambu'a mbote,  
Sambu na bantu yonso.

(Luka 17:5)

1. Ntima na beto ke mbote ve Nzambi,  
     Sa beto ke bantu ya masumu.  
 Disumu’a ke bwisaka beto mingi—  
     Ke kukonda kukwikila na nge.

***(REFRAIN)***

*Yika beto lukwikilu Yehowa.  
 Sadisa beto sa beto bwa ve.  
 Yika beto lukwikilu mpi ngolo,  
 Sambu beto kumisa nge mingi.*

2. Kana beto ke ve ti lukwikilu,  
     Beto lenda sepedisa nge ve.  
 Beto ke ve na boma ya makwisa.  
     Lukwikilu ke tanina beto.

***(Refrain)***



# 119 *Beto Fwete Vanda na Lukwikilu*

(Baebreo 10:38, 39)

1. Ntete Nzambi tubilaka bantu  
Na nzila ya baprofete.  
Bubu yandi ke songa beto nde,  
'Beno balula ntima.'

*(REFRAIN)*

*Lukwikilu ya ngolo ke  
Mfunu sa na kuguluka.  
Sambu yo tanina beto,  
Yo fwete monana na bisalu.*

2. Beto ke landa nsiku ya Yezu  
Ya kuzabisa kieleka.  
Beto ke longa yo ti kikesa,  
Beto ke bumba yo ve.

*(Refrain)*

3. Lukwikilu na beto ke ngolo;  
Beto ke waka ve boma.  
Sambu luguluku me finama,  
Beto fwe kanga ntima.

*(Refrain)*

# ***120 Landa Mbandu ya Mawete ya Kristu***

(Matayo 11:28-30)

1. Yezu ke muntu ya kuluta nene;  
Kansi yandi ke vandaa ve lulendo.  
Ata yandi ke ti mukumba'a nene,  
Yandi kele ya kudikulumusa.
2. Yandi ke tuba nde yandi ta nata  
Bizitu ya bantu yina me lemba,  
Bo ke baka kikesa mingi mpenza,  
Ntangu bo ke sosa ntete Kimfumu.
3. Yezu tubaka beto ke 'bampangi.'  
Mpi beto ke lemfukaka na Mfumu.  
Na meso ya Nzambi bantu'a mawete  
Kele mfunu mpi bo ta baka ntoto.

# **121**     *Beto Ke na Mfunu ya Kudiyala* (Baroma 7:14-25)

1. Ata beto ke zolaka Nzambi,  
    Beto fwe kudiyala sa na mambi.  
    Mambu ya kinsuni ke lufwa,  
    Mambu'a kimpeve ke luzingu.
  
2. Satana ke mekaa beto mingi,  
    Mpi masumu lenda kubwisa beto.  
    Kieleka me luta masumu  
    Mpi ntima na beto le nunga.
  
3. Mambu ya beto ke sala lenda  
    Pesa zina'a Nzambi lukumu to ve.  
    Beto fwe sala mambu'a mbote,  
    Mpi kudiyala ntangu yonso.

# 122 *Beto Vanda Ngolo, mpi Beto Bwa Ve!*

(1 Bakorinto 15:58)

1. Makanda kele na mpasi mingi.  
Bantu ke na boma ya makwisa.  
Kansi beto fwete vanda ngolo,  
Mpi kusadila Nzambi.

*(REFRAIN)*

*Beto fwe vanda ngolo,  
Mpi kutina nsi-ntoto,  
Beto fwete vanda  
Ngolo tii na nsuka.*

2. Bampukumuna ke mingi bubu.  
Kansi beto lenda kununga yo.  
Kana beto ke menga mambu'a mbi,  
Beto ta vanda ngolo.

*(Refrain)*

3. Sambila Yehowa na kieleka.  
Mpi salaka kisalu ya Mfumu.  
Ntangu yonso longa nsangu'a mbote,  
Sa nsuka me finama.

*(Refrain)*

# 123 *Lemfuka na Kwikama Yonso na Teokrasi*

(1 Bakorinto 14:33)

1. Bantu ya Yehowa, beto kwe longa  
Bakieleka ya Kimfumu na ntoto.  
Beto fwete lemfukila Yehowa,  
Kuvanda kwikama mpi na bumosi.

*(REFRAIN)*

*Beto fwe lemfukila Yehowa  
Na luzolo yonso.  
Yandi ke zolaka beto mingi,  
Beto kangama nandi.*

2. Mpeve ya Nzambi mpi kapita nandi,  
Ke twadisaka beto na luzingu.  
Yo yina beto fwe vanda kikesa,  
Mpi kulonga kieleka na kwikama!

*(Refrain)*

1. Beto kele ya kwikama,  
Mpi ke zolaa Yehowa.  
Beto yonso bantu nandi,  
Fwe zaba nsiku nandi.  
Bandongisila na yandi,  
Beto ta lemfukila.  
Yandi kele ya kwikama,  
Beto kangama nandi.
2. Beto kele ya kwikama  
Na bampangi na beto.  
Na bisalu mpi bangogo,  
Beto fwe sadisa bo.  
Beto fwete zitisaka  
Bampangi na masonga.  
Beto fwete bika bo ve,  
Beto kangama ti bo.
3. Beto kele ya kwikama  
Na bankuluntu yonso.  
Beto lemfuka ntangu bo  
Ke longisila beto.  
Beto ta baka mambote  
Mpi ta kuma kikesa.  
Kana beto ke kwikama,  
Nzambi ta ndima beto.

# 125 “Kiese na Bantu ya Ntima-Mawa!”

(Matayo 5:7)

1. Nzambi na beto ya kiese,  
Ke wilaa mpi bantu mawa.  
Yandi ke pesaka beto  
Bima ya konso kilumbu.  
Yandi ke lolulaka mpi,  
Bantu’a me balula ntima.  
Yandi ke yibukaka nde,  
Beto ke kaka mfututu.
2. Kana beto me sumuka  
Mpi beto lomba ndolula,  
Yezu songaa beto mpila  
Ya kubondila Yehowa:  
“Lolula bifu na beto,  
Mpila beto ke lolulaa.”  
Kana beto katula mpi  
Kimbeni, be ta zwa ngemba.
3. Beto yonso fwe kabaka,  
Beto fwete sala yo ve,  
Sa na kubaka lukumu,  
Kansi na luzolo yonso.  
Nzambi ta mona yo mpenza  
Mpi yandi ta futa beto.  
Ee, kiese na bantu’a mawa,  
Sa Nzambi ke ndimaka bo.

# 126 *Kangula Meso, Vanda Ngolo*

(1 Bakorinto 16:13)

1. Kangula meso, va ngolo,  
Kanga kibeni ntima.  
Beto fwe vanda kikesa  
Sambu beto ta nunga.  
Beto fwe lemfukaka mpenza  
Na nsiku ya mbote ya Yezu.

*(REFRAIN)*

*Kangula meso, vanda ngolo!  
Sala yo tii na nsuka!*

2. Landa kukangula meso  
Mpi lemfukila Mfumu.  
Landa lutwadisu'a Kristu,  
Ke pesa mpika bubu.  
Wa ndongisila'a bankuluntu,  
Bo ke taninaka mameme.

*(Refrain)*



3. Beto fwe kangula meso  
Mpi kulonga kieleka.  
Ata bambeni ke mingi,  
Beto fwe yambula ve.  
Beto fwete kumisa Nzambi  
Kilumbu nandi me finama!

*(Refrain)*

*Mutindu ya Muntu Yina  
Mu Fwete Vanda*  
(2 Piere 3:11)

1. Inki mono lenda pesa nge Mfumu  
Sambu na dikabu na nge ya luzingu?  
Kitala-tala na mu ke Ndinga na nge;  
Sadisa mono na kuditala mbote.

*(PONT)*

Mono me silaka na kupesa nge,  
Luzingu na mu sambu mu sadila nge.  
Mu fwe sadila nge na ntima'a mvimba;  
Bika mu pesa nge kiese mingi.

Sadisa mono na kumona mpila  
Ya nge ke zolaka nde mono kuvanda.  
Nge ke zolaka mingi bantu'a kwikama;  
Nzala na mu ke ya kupesa nge kiese.

1. Bible ke pesa bikuma  
Ya kukanga ntima.  
Mambu ya nge longukaka  
Mpi ya nge ke zolaka,  
Ke ya kieleka kibeni,  
Vanda kaka kwikama.  
Yibuka kilumbu'a Nzambi;  
Ebuna nge ta toma.
  
2. Nge fwete kuvidisa ve  
Zola na nge'a ntete.  
Nge ta kutana ti mpasi  
Mpi mimekamu mingi.  
Kansi nge fwe kanga ntima,  
Mpi nge fwe wa ve boma.  
Yehowa ta gulusa nge  
Mpi ta yambula nge ve.

3. Nzambi ta gulusa bantu  
Ya ke kanga ntima.  
Bazina na bo ta vanda  
Na buku ya luzingu.  
Bika nde kukanga ntima,  
Sala kisalu na yo.  
Yehowa ta ndimaka nge  
Mpi ta pesa nge kiese.

# 129 *Beto Ta Landa Kukanga Ntima*

(Matayo 24:13)

## 1. Nki le sadisa

Beto na kukanga ntima?  
Na ntangu'a mpasi  
Yezu Kristu talaa kaka  
Mambu ya kitoko,  
Ya vandaa na ntwala.

*(REFRAIN)*

*Beto fwe kanga ntima,  
Beto fwe lemba ve.  
Sa Yah ke zolaa beto,  
Beto fwe landa kukanga ntima.*

## 2. Ata luzingu

Le natila beto mawa,  
Beto ke mona  
Kiese mpi kimpwanza yina  
Beto ta baka na  
Bilumbu ke kwisa.

*(Refrain)*

3. Kuyambula ve

Mpi kuvanda ve ti boma.

Sadila Nzambi

Na kwikama tii na nsuka.

Kanga kaka ntima,

Nsuka me finama.

*(Refrain)*

1. Na nzila ya Yezu,  
    Nzambi yidikaa mambu,  
    Sa na kukatula lufwa,  
    Kulolula masumu.  
Sa yandi lolula beto  
    Na nzila ya nkudulu,  
    Beto fwe balula ntima  
    Mpi kulomba ndolula.
2. Beto yonso fwete  
    Lolulaka bampangi  
    Sa Nzambi lolula beto  
    Mpi wila beto mawa.  
Beto fwe wila bo mawa,  
    Mpi kuwa mpasi ti bo;  
Beto fwete kumisa bo  
    Mpi kuzola bo mingi.
3. Beto yonso fwete  
    Lolulaka bankaka.  
Sambu beto vanda ve ti  
    Kimbeni mpi ntima mbi.  
Kana beto ke ti zola  
    Mingi bonso Yehowa,  
Beto ta landa mpi mbandu  
    Nandi ya kulolula.

# 131 “Yina ya Nzambi Me Vukisaka”

(Matayo 19:5, 6)

1. Nsinga’a bo me salaa,  
Na bansinga tatu.  
Ke kangamaa ngolo na,  
Kiese ti luzitu.

*(REFRAIN 1)*

*Bakala silaa Nzambi  
Na kuzola nkento.*

*“Ya Nzambi me vukisa,  
Muntu kabula ve.”*

2. Bo zole kele ya  
Kwikama na Nzambi,  
Bo ke lomba Nzambi na  
Kusakumuna bo.

*(REFRAIN 2)*

*Nkento silaa Nzambi na  
Kuzola bakala.*

*“Ya Nzambi me vukisa,  
Muntu kabula ve.”*



# ***132 Ntangu Yai Beto Kele Muntu Mosi*** (Kuyantika 2:23, 24)

1. Nge ke mpenza mukwa na mu,  
Nsuni na mu; nge ke ya mono.  
Nzambi me pesa mu nduku,  
Ya bubu ti mbasi.

Ntangu yayi beto lenda  
Baka mambote beto zole.  
Beto me kuma dibuta,  
Bakala mpi nkento.

Beto ta sadilaka Nzambi.  
Beto fwe songa  
Zola ya ngolo mpenza.

Beto fwete kulungisa  
Lusilu ya beto salaka.  
Mu ta zolaka nge kaka,  
Yehowa baka lukumu.

1. Baleke ke mfunu sa na Nzambi,  
Bo ke salaa ngolo na kwikama.  
Yandi ta kebaka bo na zola,  
Mpi yandi ta sakumunaka bo.
2. Beto ke kumisaka bibuti  
Sambu bo ke sadisaka beto.  
Beto ta kuma banduku'a Nzambi,  
Bantu mpi Nzambi ta ndima beto.
3. Yibuka Yehowa na kileke,  
Mpi landa na kuzola kieleka.  
Kana nge kudipesa ya mvimba  
Nge ta pesa Nzambi kiese mingi.

*Bana Kele Dikabu  
ya Me Katuka na Nzambi*  
(Nkunga 127:3-5)

1. Ntangu bakala ti nkento

Ke butaka mwana na bo mosi,  
Bo fwete vila ve nde yandi,  
Ke dikabu ya Yehowa.  
Yandi kele ve ya bo mpamba;  
Nzambi muntu ke pesaa luzingu,  
Yandi ke pesaa mpi bibuti  
Lutwadisu ya bo fwe landa.

*(REFRAIN)*

*Yehowa me pesaka beno  
Dikabu mosi ya mfunu.  
Beno longi mwana na beno  
Bansiku yonso ya Nzambi.*

2. Bansiku yonso ya Nzambi

Fwete vanda na ntima na beno.  
Beno kele ti mukumba ya  
Kulonga bana na beno.  
Na ntangu beno me telama,  
Na nzila, mpi na ntangu'a kupema.  
Yehowa ta sakumuna bo  
Kana bo bikala kwikama.

*(Refrain)*

# 135 “Mwana na Mono, Vanda Mayele”

(Bingana 27:11)

1. Baleke’a bankento ti ya babakala,  
Beno pesa mono bantima na beno,  
Ebuna mbeni mpi nsi-ntoto ta mona  
Nde beno me kudipesaka na mono.

*(REFRAIN)*

*Beno bana’a mu ke zolaka,  
Beno pesa mono kiese,  
Be vanda ngangu mpi mayele,  
Beno pesa mu lukumu.*

2. Beno pesa mono luzingu na beno;  
Kana beno bwa mu ta tombula beno.  
Ata bo sadila beno mambu ya mbi,  
Mono ta zolaka beno ntangu yonso.

*(Refrain)*

*“Lufutu ya Kukuka”  
Yina Yehowa Ke Pesaka  
(Ruti 2:12)*

1. Yehowa Nzambi kele ya kwikama  
 Mpi yandi ke zabaka nde,  
 Bantu’a ke salaka na ntima’a mvimba,  
 Le vidisa bima na bo.  
 Kana nge me bikisa bampangi,  
 Banzo, to banduku na nge,  
 Nzambi ta pesa nge bampangi bubu  
 Mpi luzingu na ntoto’a mpa.

*(REFRAIN)*

*Bika nde Yehowa kufuta nge,  
 Yandi pesa nge lufutu’a mbote.  
 Bika nde yandi tanina nge.  
 Yandi ke masonga mpi ke kwikama.*

2. Bantangu’a nkaka beto le mona nde  
 Mpasi me lutila beto,  
 Mpi beto ke kuka ve kulungisa  
 Bampusa’a konso kilumbu.  
 Sambu Yehowa ke waka bisambu,  
 Yandi ke vilaka yo ve.  
 Biblia, banduku, mpi mpeve santu  
 Ta pesa beto kikesa.

*(Refrain)*

*Bankento ya Kwikama,  
Bampangi-Bankento*  
(Baroma 16:2)

1. Sara ti Estere, Maria mpi Ruti—  
Bo vandaka bankento ya kwikama.  
Bo kangamaka kaka na Yehowa.  
Mpi beto me zaba bazina na bo.  
Bankento mingi'a nkaka mpi vandaa,  
Kwikama ata bo me zabanaka ve.
2. Kwikama, kikesa, mpi ntima-mbote—  
Ke bikalulu ya kitoko mingi,  
Yina bankento yayi monisaka.  
Bo ke kibeni bambandu ya mbote.  
Bampangi bankento ya kwikama,  
Ke na kupesa mbandu ya mbote bubu.
3. Bamama, bana, bankento, mifwidi,  
Beno sadila Yehowa na kiese.  
Beno vanda luzitu mpi bulemfu.  
Beno tina ve boma ata fioti,  
Sambu Nzambi ke ndimaka beno.  
Ntama ve yandi mosi ta futa beno.

# 138 *Kitoko ya Nsuki ya Mpembe* (Bingana 16:31)

1. Bampangi ya me nuna  
Kele ve ngolo.  
Kansi bo ke kwamina,  
Ke kanga-ntima.  
Bankaka bankwelani  
na bo me fwaka.  
Tata, kuvila bo ve,  
Sakumuna bo.

*(REFRAIN)*

*Tata kuvila ve*

*Kundima na bo.*

*Songa bo nde beno:*

*“Me sala mbote!”*

2. Bantu ya nsuki mpembe  
Mpi ya kwikama,  
Kele kitoko mingi  
Sa na Yehowa.  
Bo vandaa mpi baleke,  
Bo va kwikama,  
Bo sadilaka Nzambi,  
Na ntima’a mvimba.

*(Refrain)*

**139**     ***Kudimona Ntangu Bima Yonso***  
***Ta Vanda ya Mpa***  
(Kusonga 21:1-5)

1. Kudimona, mona mono;  
Mona beto yonso na ntoto'a mpa.  
Yindula nde nge ke zinga,  
Na ngemba, na kimpwanza mpenza.  
Bantu yonso ya mbi ta fwa;  
Luyalu ya Nzambi ta nunga.  
Ntoto ta kuma kisika mosi'a mpa,  
Beto ta yimbaka na ntima ya mvimba:

***(REFRAIN)***

*“Yehowa mersi sa nge me sala.  
Bima yonso'a mpa na nzila'a Mwana.  
Ntonda na beto ke monana na nkunga;  
Lukumu mpi nkembo yonso kele ya nge.”*



2. Kudimona, mona mono;  
Mpi vingila insi-ntoto ya mpa.  
Kima mosi ve ta nata  
Beto na kuvanda na boma.  
Mambu yonso me lungana;  
Bantu ke na tenta ya Nzambi.  
Ntangu yayi bafwa ta futumuka,  
Mpi bo ta kwi yimba ti beto na ntonda:

*(Refrain)*

# 140      *Luzingu ya Kukonda Nsuka!*

(Yoane 3:16)

1. Yindula na mabanza,  
    Bantu kele na ngemba.  
Mawa, mpasi me mana,  
    Yayi kele kiese.

*(REFRAIN)*

*Yimbila Yehowa,  
    Na ntima ya mvimba.  
Kinga kilumbu yina,  
    “Bantu ta guluka!”*

2. Kimununu ta mana,  
    Nzambi ta va ti bantu.  
Mpasi, boma, kudila,  
    Ta vanda diaka ve.

*(Refrain)*

3. Paladisu ta kwisa  
    Na nkembo ya Yehowa.  
Beto ta kumisaka  
    Nzambi kimakulu.

*(Refrain)*

1. Konso bebe mpi, Matonsi'a mvula,  
Konso nsemo ya ntangu, Konso mbuma—  
Bima yayi ke Makabu'a Nzambi,  
Yandi ke pesaka yo konso kilumbu.

*(REFRAIN)*

*Dikabu yayi fwe pusaka beto na kuzola*

*Muntu yina me pesaka yo.*

*Beto le zwa yo ve, Na ngolo na beto.*

*Dikabu'a luzingu Ke kimangu'a nene.*

2. Bantu ya nkaka Le lemba nitu,  
Mpi bo le tuba bonso nkento'a Yobi:  
"Finga Nzambi, fwa," Kansi beto ve.  
Beto fwe kumisa yandi konso ntangu.

*(REFRAIN)*

*Dikabu yayi fwe pusaka beto Na kuzola*

*Bampangi na ntima ya mvimba.*

*Beto le zwa yo ve, Na ngolo na beto.*

*Dikabu'a luzingu Ke kimangu'a nene.*

# 142 *Beto Tanina Kivuvu na Beto*

(Baebreo 6:18, 19)

1. Bantu me yunganaka na kati'a mpimpa,  
Bo me bebisaa ngolo na bo mpamba.  
Kifu na bo me monana pwelele;  
Bo lenda ve kudigulusa.

*(REFRAIN)*

*Yangalala Kimfumu me kwisa!*

*Yezu ta kwi pesa beto kimpwanza,*

*Yandi ta kwisa katula mambi,*

*Kivuvu yayi ke pesa kikesa.*

2. “Kilumbu ya Nzambi me finama!” mpenza,  
Bantu ta boka dia ve “Tii nki ntangu?”  
Nzambi ta pesa lugangu kimpwanza.  
Ee beto kumisa Nkwa-ngolo.

*(Refrain)*

# 143 *Landa Kusala mpi Kukengila* (Baroma 8:20-25)

1. Nzambi ya bantangu yonso,  
Zina na yandi Yehowa—  
Bidimbu ke monisa nde  
Nsuka kele ve ntama.

*(REFRAIN)*

*Landa kusala mpi kukengila,  
Mona ti kiese luzingu  
Yina Nzambi ke sila.*

2. Yandi me tulaka dezia  
Ntangu yina Yezu ta fwa  
Bambeni na yandi yonso.  
Yandi ta nunga mpenza.

*(Refrain)*

3. Ata lugangu ke dila,  
Na lukwikilu beto ke  
Kinga kilumbu'a Yehowa,  
Kilumbu ya kimpwanza.

*(Refrain)*

(2 Bakorinto 4:18)

1. Ntangu bifwa-makutu ta wa,  
Ntangu bifwa-meso ta mona,  
Na ntangu bana ta yimbaka  
Kiese, ngemba, ta fuluka  
Ntangu bafwa ta futumuka  
Na ntoto'a kukonda masumu,

*(REFRAIN)*

*Nzambi ta sala mambu yayi,  
Tula meso na dikabu.*

2. Mbwa-nseke ta dia ti dimeme,  
Mpi urse ta vanda ti ngombe,  
Mwana-fioti ta twadisa bo,  
Mpi bo ta landaka yandi.  
Ebuna mansanga ta yuma,  
Mpi boma ti mpasi ta mana,

*(Refrain)*

# 145 *Paladisu Kele Lusilu ya Nzambi* (Luka 23:43)

1. Paladisu, Nzambi silaka  
Na nzila ya Yezu Kristu,  
Mpi yandi ta katula mpenza,  
Lufwa, mpasi, mpi masumu.

*(REFRAIN)*

*Paladisu ta salama,  
Mpila Yezu me silaka.  
Beto fwete tula ntima,  
Sambu Nzambi le kusa ve.*

2. Yezu ta futumuna bafwa,  
Ntama ve awa na ntoto.  
Mpila yandi silaka ntama:  
'Nge ta mona Paladisu.'

*(Refrain)*

3. Paladisu, Mfumu silaka,  
Mpi yandi ke na kuyala.  
Konso kilumbu beto tonda  
Nzambi mpi kukumisa'andi.

*(Refrain)*

# 146 'Kusala Bima Yonso ya Mpa'

(Kusonga 21:1-5)

1. "Bidimbu" ke songa Nzambi ke yala.  
Yezu ke na kiti ya Kimfumu,  
Ya me kula Satana na zulu.  
Mpi luzolo'a Nzambi ta salama.

*(REFRAIN)*

*Nzambi! Ke tubaa nde yandi  
Fwete sala bima ya mpa.  
Tenta nandi ta vanda ti bantu,  
Mpi yandi mosi ta vanda ti bo.  
Mpasi, mawa, lufwa ta vanda ve  
Yayi mambu'a kieleka.*

2. Bika bantu yonso kumona mpenza,  
Yeruzalemi'a mpa, nkento'a Kristu.  
Yandi me lwata bima'a kitoko.  
Yehowa ta vanda nsemo nandi.

*(Refrain)*

3. Mbanza yayi ta sepedisa bantu.  
Bo ta kangaa ve bakielo na yo.  
Nkembo na yo ta tambwisa bantu;  
Beto fwe monisa nsemo yina.

*(Refrain)*



# 147 Lusilu ya Luzingu ya Mvula na Mvula

(Nkunga 37:29)

1. Nzambi me silaka beto.  
Luzingu'a kimakulu.  
'Bantu ya mbote' ta toma  
Awa na nsi-ntoto.

*(REFRAIN)*

*Beto ta zingaka,  
Ee mvula na mvula.  
Lusilu'a Yehowa,  
Yo ta lungana.*

2. Na Paladisu, Yehowa  
Ta pesa beto ngemba,  
Nitu ya kukuka mpenza,  
Mpi kimpwanza mingi.

*(Refrain)*

3. Mawa mpi mpasi ta suka,  
Bafwa ta futumuka.  
Zola'a Nzambi ta sala nde,  
Mansanga kumana.

*(Refrain)*

1. Yehowa nge mpamba ke Nzambi ya moyo;  
Nge muntu salaka  
zulu, ntoto, masa.  
Ata nzambi mosi ve  
lenda fwanana ti nge.  
Nge ta fwa bambeni.

*(REFRAIN)*

*Yehowa ke gulusaa bantu'a mbote.  
Bansadi nandi ta mona Ngolo nandi.  
Yo yina beto fwe zabisa lukumu ti  
Nkembo nandi  
mpi kukumisa zina nandi.*

2. Kana bansinga ya lufwa kuziunga mu,  
“Yehowa, pesa mu  
kikesa mpi ngolo.”  
Wa kudila na mu na tempelo,  
“bumba munu,  
Nzambi, gulusa mu.”

*(Refrain)*

3. Nge ta ngana mpenza katuka na zulu.

Bambeni na nge ta

tekita na boma,

Mpi beto ta wa kiese

na kumona mpila nge

Me gulusa beto.

*(Refrain)*

1. Yimbila Nzambi. Zina na yandi kele nene.  
Basoda'a Ezipte, Yandi me fwa na masa.  
Kumisa yandi,  
Zina nandi kele Yehowa.  
Ya nkaka kele ve;  
Yandi me nunga mvita.

*(REFRAIN)*

*Yehowa ke Muntu'a kuluta  
Nene mpi yandi ke sobaka ve.  
Ntama ve yandi ta fwa bambeni,  
Ta santisa zina nandi.*

2. Bubu makanda Yonso ke nwanisa Yehowa.  
Ata bo kele ngolo Kuluta Farao.  
Na mvita'a Nzambi,  
Bo ta mona nsoni mpi ta fwa.  
Bantu ta zaba nde  
Yehowa kele Nzambi.

*(Refrain)*

# **150 Sosa Nzambi Sambu Nge Guluka**

(Sefania 2:3)

1. Bantu ya makanda  
Ke telamina Yezu.  
Ntangu ya Nzambi pesaa bo  
Na kuyala me suka.  
Kimfumu ya Nzambi  
Ke yala ntangu yayi.  
Kubika fioti Yezu Kristu  
Ta fwa bambeni nandi.

**(REFRAIN)**

*Sosa Yah sa nge guluka.  
Ee, tudila yandi ntima.  
Lunungu sosa,  
Vanda kwikama,  
Kotila luyalu nandi.  
Mpi tala mutindu yandi  
Ta gulusa nge.*

## 2. Bantu ya nsi-ntoto

Ke wa nsangu ya mbote.

Bo mosi fwe pona kana

Bo ta ndima yo to ve.

Bampasi ya ngolo

Fwe bangisa beto ve,

Sambu Yehowa ke kebaka

Bantu nandi'a kwikama.

*(Refrain)*

1. Luzingu na beto me fwanana,  
 Kibeni ti lubungi.  
 Yo ke basikaa mpi ke vilaka,  
 Kaka na mbala mosi.  
 Muntu ya kufwa le zinga diaka?  
 Wa lusilu ya Nzambi:

*(REFRAIN)*

*Yehowa Ta binga bafwa,  
 Mpi bo ta ndima mpenza.  
 Sambu ya ta sepela  
 Na kisalu na yandi.  
 Landa na kutula ntima,  
 Sa Nzambi le sadisa.  
 Mpi beto ta zingaka,  
 Kukonda nsuka mpenza.*

2. Ata banduku ya Nzambi kufwa,  
 Yandi ta yibuka bo.  
 Bafwa ya ke na mabanza nandi,  
 Ta futumuka mpenza.  
 Mpi beto ta zinga kimakulu:  
 Na kati'a Paladisu.

*(Refrain)*

---

# Index ya Kele na Alfabe:

- Bambangi, Beno Kwenda na Ntwala! 61  
Bana Kele Dikabu ya Me katuka  
na Nzambi 134  
Bangungudi Ke Makabu ya Bantu 103  
Bankento ya Kwikama,  
Bampangi-Bankento 137  
Beno Kumisa Yah mpi Yezu 16  
Beno Kuna Nkeni ya Kimfumu 68  
Beno Kwisa Kubaka Ngolo 87  
Beno Kwisa Kuyimba Nkunga  
ya Kimfumu! 74  
Beno Salaka Yo Sambu na Mono 26  
Beno Yambana Mbote 85  
“Beno Zikisa Mambu ya Kuluta Mfunu” 35  
Beto Fwete Vanda na Lukwikilu 119  
Beto Katula Bambuma na Kiese 64  
Beto Ke Bambangi ya Yehowa! 63  
Beto Kele Basoda ya Yehowa! 71  
Beto Kele Bantu ya Nani? 40  
Beto Kele na Ngemba 113  
Beto Ke na Mfunu ya Kudiyala 121  
Beto Ke Tonda Nge, Yehowa 46  
Beto Ke Zingaka Sambu na  
Ndinga ya Nzambi 97  
Beto Kumisa Ntotila ya Mpa ya Ntoto 14  
Beto Kuna Zola 106  
Beto Me Kudipesaka na Nzambi! 51  
Beto Pesana Kikesa 90  
Beto Pesa Nzambi Nkembo 59  
Beto Sala na Bumosi 101  
Beto Ta Landa Kukanga Ntima 129  
Beto Tanina Kivuvu na Beto 142  
Beto Vanda Ngolo, mpi Beto Bwa Ve! 122  
Beto Yamba Bo 100  
Beto Zabisa Kieleka ya Kimfumu 72  
Beto Zitisa Zina na Beto 29  
Beto Zolana Ngolo na Ntima  
ya Mvimba 109  
Bikalulu ya Yehowa 1  
“Bika nde Nsemo na Beno Kusema” 82  
Bikuma ya Kiese na Beto 111  
Bimvuka Mingi ya Bampangi 99  
Bisalu ya Kuyituka ya Nzambi 5  
Bo Fwe Longa Beto 86  
Bo Ta Baka Moyo 60  
Ee, Tambula ti Nzambi! 31  
Kangama ti Nzambi! 32  
Kanga Ntima tii na Nsuka 128  
Kangula Meso, Vanda Ngolo 126  
“Kiese na Bantu ya Ntima-Mawa!” 125  
“Kiese ya Yehowa” 110  
Kikalulu ya Bumbote 117  
Kimangu ya Luzingu 141  
Kima ya Nzambi 25  
Kimfumu Ke Yala—Bika Yo Kwisa! 22  
Kisalu na Beto ya Zola 91  
Kisambu na Mono ya Kudipesa 50  
Kisambu ya Kuvutula Matondo 43  
Kisambu ya Nsadi ya Nzambi 42  
Kisambu ya Nsukami 44  
Kisika ya Kele na Zina na Nge 92  
Kitoko ya Nsuki ya Mpembe 138  
Konso Kilumbu Tambula ti Yehowa 48  
Kristu Kele Mbandu na Beto 13  
Kudibongisa na Kusamuna 53  
Kudimona Ntangu Bima Yonso  
Ta Vanda ya Mpa 139  
Kudipesa ya Bukristu 52  
Kuma Nduku ya Yehowa 28  
Kumisa Yehowa, Nzambi na Beto! 10  
Kumonana ya Bana ya Nzambi 27  
Kusamuna na Bantu ya Mitindu Yonso 57  
‘Kusala Bima Yonso ya Mpa’ 146  
Kusepedisa Yehowa 49  
Kusosa Banduku ya Ngemba 58  
Kutina Bo Ve! 55  
Kuzola 84  
Kwe Longa Kimfumu ya Nzambi! 69



Kwendaka na Ntwala! 65  
 Kwisa na Ngumba ya Yehowa 24  
 Landa Kusala mpi Kukengila 143  
 Landa na Kusosa Ntete Kimfumu 21  
 Landa Mbandu ya Mawete ya Kristu 120  
 Lemfuka na Kwikama Yonso  
     na Teokrasi 123  
 Lolulaka 130  
 Longa Bo na Kutelama Ngolo 79  
 ‘Longa Ndinga ya Nzambi’ 78  
 “Longa Nsangu” 67  
 Losila Yehowa Kizitu na Nge 33  
 “Lufutu ya Kukuka” Yina Yehowa  
     Ke Pesaka 136  
 Lugangu Ke Kumisaka Nzambi 11  
 Lukumu na Yezu! 15  
 Lusilu ya Luzingu ya Mvula na Mvula 147  
 Luzingu ya Kukonda Nsuka! 140  
 Luzingu ya Mupasudi-Nzila 81  
 Madia ya Nkokila ya Mfumu 19  
 Mambu ya Mono Ke Yindulaka 45  
 Masonuku Kele ya Kupemama  
     na Nzambi 98  
 Mbandu ya Zola ya Nzambi 107  
 ‘Meka mpi Mona nde Yehowa  
     Ke Mbote’ 80  
 ‘Me Zola’ 17  
 “Mono Yandi Yai, Tinda Mono!” 75  
 “Monisa Ntima ya Nda” 114  
 Mpeve Santu Kele Dikabu ya Nzambi 104  
 Mukanda ya Nzambi Kele Kimvwama 96  
 Mutindu ya Muntu Yina Mu Fwete  
     Vanda 127  
 “Mwana na Mono, Vanda Mayele” 135  
 Nge Ke Kudiwaka Nki Mutindu? 76  
 Nge Pesaka Yezu 20  
 Ngolo na Beto mpi Kivuvu na Beto 3  
 Ngolo ya Ntima-Mbote 116  
 Nkunga ya Kununga 149  
 Nkunga ya Mpa 62  
 Nsemo Kusema Diaka Mingi 95  
 Nsemo na Nsi-Ntoto ya Mpimpa 77  
 Ntangu Yai Beto Kele Muntu Mosi 132  
 Ntonda Sambu na Ndinga ya Nzambi 94  
 Ntonda Sambu na Nkudulu 18  
 Ntonda Sambu na Ntima ya Nda  
     ya Nzambi 115  
 “Nzo na Nzo” 83  
 “Nzambi Kele Zola” 105  
 Nzambi ya Nene, Yehowa 12  
 Paladisulu Kele Lusilu ya Nzambi 145  
 Pesa Beto Kikesa 73  
 ‘Sadisa Bayina Me Lemba’ 102  
 Sadila Yehowa na Moyo ya Mvimba 37  
 Sakumuna Balukutakanu na Beto 93  
 Samba Yehowa Konso Kilumbu 47  
 Sambila Yehowa na Kileke 133  
 Songa Mono Banzila na Nge 88  
 Sosa Bantu ya Me Fwana 70  
 Sosa Nzambi Sambu Nge Guluka 150  
 Tata, Nzambi, mpi Nduku 30  
 Tambula na Kwikama 34  
 Tanina Ntima na Nge 36  
 Tula Meso na Dikabu! 144  
 Vanda Kwikama 124  
 Wa Kisambu na Mono 41  
 Widikila mpi Lemfuka 89  
 “Yai Nzila” 54  
 Yandi Ta Binga 151  
 Yandi Ta Pesa Nge Ngolo 38  
 Yehowa Me Yantika Kuyala 23  
 Yehowa, Nzambi ya Ngemba 112  
 Yehowa Ke Gulusaka 148  
 Yehowa Kele Kitininu na Beto 8  
 Yehowa Kele Ngolo na Beto 7  
 “Yehowa Kele Ngungudi na Mono” 4  
 Yehowa Kele Ntotila na Beto! 9  
 “Yika Beto Lukwikilu” 118  
 “Yina ya Nzambi Me Vukisaka” 131  
 Zabisa Nsangu ya Mbote 66  
 Zina na Nge Yehowa 2  
 Zina ya Mbote na Meso ya Nzambi 39  
 Zola Kieleka 56  
 Zola ya Kwikama ya Nzambi 108  
 Zulu Ke Kumisaka Nzambi 6